

四庫全書

史部

欽定四庫全書

史部

江西通志卷八十七

詳校官監察御史<sub>臣</sub>范衷

檢討<sub>臣</sub>德生覆勘

總校官知縣<sub>臣</sub>楊懋珩

校對官編修<sub>臣</sub>沈清藻

謄錄監生<sub>臣</sub>施華

欽定四庫全書

江表傳卷八十七

人物

饒州府

漢

吳芮秦時番陽令也甚得江湖間民心號曰番君黥布  
初歸芮芮妻之因舉兵應諸侯沛公攻南陽遇芮將  
梅鋗與偕攻析酈降之及項羽相王以芮率百越佐

諸侯入關立為衡山王項籍死上以鉞從入武關  
故德為徙為長沙王一年薨謚曰文王子成王臣嗣  
初文王為高祖賢之制詔御史長沙王忠其定著令  
至孝惠時封為庶子二人為列侯傳國數世絕

前漢

書

按漢書稱為番陽令而一統志豫章書皆以為  
為番陽人又按梅鎬為將史記漢書不載何許  
人楚紀以為長沙人粵大記以為越人一統志云



銷禍軍山死葬梅港軍山在南豐縣南梅港在餘

干縣人物志遂以銷為餘干人未敢信也

原跋

陳靖字康叔餘干人慷慨有大志憤王莽篡漢王常起  
往赴之會盜聚長山喻以順逆盜張桀意氣頗異人  
靖舉酒喻曰漢室中顛君能為國反正樹功當效薦  
引桀謝曰敢不從命遂集義兵得千餘人赴常常大  
喜署為中牙典軍校尉御戢有方得江湖人心常見  
光武首言靖功授散騎常侍以母老乞歸養封餘干

金  
卷八十七  
侯 豫 章 書

雷義字仲公鄱陽人初為郡功曹擢舉善人不伐其功  
嘗濟人死罪罪者後以金謝之義不受金主伺義不  
在默投金於承塵上後葺理屋宇乃得金金主已死  
義乃以付縣曹後舉孝廉拜尚書侍郎有同時郎坐  
事當刑義默自表取其罪以此論司寇同臺郎覺之  
委位自上乞贖義罪順帝詔皆除刑義歸舉茂才讓  
于陳重刺史不聽義遂佯狂出走不應命鄉里為之

語曰膠漆自謂堅不如雷與陳三府同時俱辟二人  
義遂為守灌謁者使持節督郡國行風俗太守令長  
坐者凡七十人旋拜侍御史除南頓令卒官子授官  
至蒼梧太守

後漢書

張遐字子遠餘汗人七歲日記萬言年十一通易大義  
常從徐穉過陳蕃郭泰在坐曾蕃問吳炳易太極炳  
曰太極在混沌之時蒙昧未分老子謂一物混成先  
天地生是也蕃然之又問遐遐曰易無定體強名太

極大者至大之謂極者至要之謂蓋言其理至大至  
要在混沌之中一動而生陰陽陰陽者氣也所謂理  
生氣而氣寓夫理者是也泰顧炳曰遐得之矣蕃驚  
服為舉孝廉補郡功曹不就建寧間為五經博士遷  
洪都門學士以疾還里著有易傳筮原龜原五經通  
義主義吳越春秋外記

豫章書

按張遐林志以為餘干人前志引漢書淮南王田  
於餘汗以正干字之誤考漢書淮南王無田餘汗

事唯嚴助傳載王諫伐閩越書有云越人欲為變  
必先田餘干界中是餘干字亦見漢書但地理志  
本作汙又元和郡縣志隋開皇九年始去水從干  
則在漢時固應稱餘汙特不得援淮南王事以為  
據耳

晉

陶侃字士行鄱陽人徙家尋陽早孤貧為縣吏廬江太  
守張夔察侃為孝廬至洛陽數詣張華華與語異之

除郎中尚書樂廣欲會荆揚士人武庫令黃慶進侃  
於廣人或非之慶曰此子終當遠到後舉侃補武岡  
令與太守呂岳有嫌棄官歸為郡小中正會劉弘為  
荊州刺史辟侃為南蠻長史討賊張昌破之以軍功  
封東鄉侯陳敏之亂弘以侃為江夏太守敏遣其弟  
恢來寇武昌侃出兵禦之所向必破以母憂去職服  
闋叅東海王越軍事江州刺史華軼表侃為揚武將  
軍使屯夏口元帝加侃奮威將軍遷龍驤將軍武昌

太守流亡者歸之盈路侃竭資賑給焉帝使侃擊杜  
弢破之賊增兵來攻使朱伺等逆擊殺傷甚衆王敦  
表侃為使持節寧遠將軍南蠻校尉荊州刺史領西  
陽江夏武昌鎮沌口又移入沔江遣朱伺等討江夏  
賊殺之王貢與杜曾舉兵反侃為所敗坐免官以白  
衣領職復率周訪等進軍入湘使都尉楊舉為先驅  
擊杜弢大破之敦奏復侃官王貢來降弢敗走進克  
長沙獲其將毛寶高寶梁堪而還王敦深忌侃功左

轉廣州刺史以王廙為荊州侃將鄭攀蘇溫馬偽等不欲南行西迎杜曾以距廙敦意攀承侃風旨將殺侃叅軍梅陶長史陳頌言於敦曰周訪與侃親姻如左右手安有斷人左手而右手不應者乎敦意解侃便夜發進至始興杜弘與溫邵劉沉俱謀反侃擊破之以功封柴侯侃在州無事輒朝運百甕於齋外募運於齋內人問其故答曰吾方致力中原過爾優逸恐不堪事太興初進號平南將軍尋加都督交州



軍事進號征南將軍開府儀同三司及王敦平遷都  
督荆雍益梁州諸軍事領護南蠻校尉征西大將軍  
荊州刺史侃性聰敏勤於吏職恭而近禮愛好人倫  
嘗語人曰大禹聖者乃惜寸陰至於衆人當惜分陰  
諸叅佐或以戲談廢事乃命取其酒器捕博之具悉  
投於江時造船木屑及竹頭悉令舉掌之咸不解所  
以會積雪始晴廳事前猶溼以屑布地及桓溫伐蜀  
以所貯竹頭作釘裝船其綜理微密皆此類也蘇峻

作逆溫嶠邀侃同赴朝廷推為盟主部將彭世斬峻於陣峻弟逸復聚衆侃與諸軍斬逸於石頭改封長沙郡公加都督交廣寧七州軍事以江陵偏遠移鎮巴陵遣諮議叅軍張誕討五谿夷降之郭默矯詔襲殺平南將軍劉侑輒領江州侃遣將軍宋夏陳修率兵據湓口以大軍繼進默將宗侯縛默父子詣降侃斬默等詔侃都督江州領刺史侃移鎮武昌命張夔于隱為叅軍范逵于珽為湘東太守辟劉弘曾孫安

為掾屬凡徵時所荷一殮咸報遣子斌與南中郎將  
桓宣西伐樊城走石勒將郭敬使兄子臻竟陵太守  
李陽等共破新野遂平襄陽拜大將軍劔履上殿入  
朝不趨讚拜不名上表固讓疾篤又上表遜位以後  
事付右司馬王愨期侃輿車出臨津就船明日薨於  
樊谿年七十六諡曰桓尚書梅陶曰陶公機神明鑒  
似魏武忠順勤勞似孔明陸抗諸人不能及也謝安  
每言陶公雖用法而恒得法外意其為世所重如此

子十七人洪瞻夏旗斌稱範岱見舊史範最知名太

元初為光祿勳

晉書

陶瞻字道真少有才器歷廣陵相廬江建昌二郡太守  
遷散騎常侍都亭侯為蘇峻所害追贈大鴻臚諡愍

悼

同上

陶臻侃兄子字彥遐有勇略智謀江州刺史華軼表侃  
為揚武將軍使屯夏口又以臻為參軍軼與元帝素  
不平臻懼難作託疾而歸白侃曰華彥夏有憂天下

之志而才不足且與琅邪不平難將作矣侃怒遣臻還軼臻遂東歸於帝帝見之大悅命臻為叅軍後賜爵當陽亭侯咸和中為南郡太守領南蠻校尉卒官追贈平南將軍諡曰肅

同上

陶興侃兒子平南將軍臻弟果烈善戰以功累遷武威將軍初賊張奕本中州人元康中被差西征遇天下亂遂留蜀至是率三百餘家欲就杜弼為侃所獲諸將請殺其丁壯取其妻息興曰此本官兵數經戰陣

可救之以為用侃救之以配輿及侃與杜弼戰敗賊以  
桔槔打沒官軍船艦軍中失色輿率輕舸出其上流  
以擊之所向輒赴賊又率衆焚侃輜重輿擊破之賊  
望見輿軍相謂曰避陶武威無敢當者後與杜弼戰  
被重創卒侃哭之慟曰喪吾家寶軍皆為之垂泣詔

贈長沙太守

同上

范逵鄱陽孝廉嘗過陶侃時倉卒無以待賓其母截髮  
得雙髮以易酒餚樂飲極歡雖僕亦過所望及去侃

追送百餘里達曰卿欲仕郡乎侃曰欲之困於無  
津耳達過廬江太守張夔稱美之夔召為枞陽令有  
能名遷主簿侃之聲名達發之也仕至會稽太守

同上

### 南北朝

何漬餘汗人有膽畧元嘉間捕廬循將韓英有功授本

邑令

林志

劉孝慶餘汗人侯景之亂湘東王繹起兵討景孝慶率

土兵應之以功封餘汗男

安志

袁貳鄱陽人大業間兵亂倡義聚郭內居民相保守操  
師乞自新昌來攻城貳不支出居水南童敏故城與  
張善安大戰斬獲甚多武德初授懷州刺史

同上

唐

蔡明遠鄱陽人唐時為本邑校顏魯公絕糧明遠載米  
濟之魯公憐其意手書以贈盛傳於世

安志

按前志載林士弘為唐饒州人物之首考唐書士  
弘于隋末竊據江西改元儋號故削



陳饒奴饒州人年十二親亡寡弱居喪又歲飢或教其分弟妹可全性命饒奴流涕身丐訴相全養刺史李復典之給資儲署其門曰孝友童子

唐書

按唐書孝友傳尚載有鄱陽張讚樂平謝維勤皆以孝悌名朝廷旌閭賜粟帛州縣存問復賦稅附識於此

吉中孚鄱陽人官戶部侍郎與盧綸韓翃錢起司空曙苗發崔峒耿湓夏侯審李端皆能詩齊名號大厯十

才子

同上

李儼字雅之餘干人大曆進士德宗時為左司諫方士  
桑道茂奏奉天有天子氣上欲屠其城儼諫曰陛下  
始登元極當懲忿窒慾選賢任能以安社稷乃輕信  
妖言以害生靈乞斬道茂上悟乃止遷浙西節度判  
官歲飢活數萬人

林志

張鵬德興人宣宗時為河南節度書記吐蕃賀繼部落  
犯邊鵬率數千騎敗之上嘉之賜朱衣金魚懿宗

立表為瓊管五州招討使入為羽林金吾二將軍屬  
蠻人渡瀘鵬疏溪洞情狀攻守備用出為邕州刺史  
制置使尋拜嶺南西道節度使

豫章書

張敖德興人善韜畧咸通間官節度使唐時節度專擅  
國命咸通後雖么麼無不牽連為逆敖獨守正奉公  
拓境興學驅浮屠為民盡人臣職事人多其忠征西  
夏有功封饒郡公爵至上國柱

人物志

黃勉德興人咸通十四年黃巢寇長安勉與李克用合

兵討之有功追封保靈王

同上

李濤少以文學名僖宗時舉為河陽令尋舉進士光啓三年吳揚行密興義兵於江淮濤儒服謁軍門協贊大計會賊將秦彥陷揚州行密裒兵進援濤以所部為前鋒奏補都尉未幾進爵押衙檢校右散騎常侍兼御史大夫四年以功補右押衙繼遷刑部郎中復擢戶部尚書

同上

按豫章書有李潛無李濤人物志亦不詳何許人

甯賡鄱陽人同弟襄聚義兵拒黃巢保饒歙二州以功

官御史大夫

豫章書

余鐸餘干人唐尚書勲六世孫乾符二年黃巢陷饒州  
所至焚蕩鐸與鄱陽彭幼璋起義兵保障於白雲城  
下巢黨復來屢出奇拒之民賴保全立祠祀之

林志

黃金楨德興人天祐中為殿中御史時朱溫篡唐淮南  
節度使楊渥檄傳興復全楨兼八砦將首分守鄱陽  
賊忽自浙至兵寡戰敗乃自斷其首已而雷電晦冥

如有戈甲甚盛賊大驚潰全損猶於馬上自挈其首  
以歸邑人廟祀之

豫章書

姜嶠樂平人性至孝庭生連理樹刺史韋頌署曰孝行  
有聞兄弟兼美陶我王化毓此休祥

林志

沈普樂平人以孝聞居親喪有至行所居及墓俱產芝

草

安志

後五代

童發字以達德興人博學有弘度仕後晉為都統功曹

尚書僕射天福間契丹寇中原後漢劉智遠自立以  
改元問發發流涕乃悟仍稱天福曰予不敢忘晉

林志

李德柔字子懷鄱陽人性鯁直不阿為大理寺卿時元

宗欲置北寺獄諫曰世豈乏士使閑寺得弄文墨邪

議遂寢

同上

李延鄒鄱陽人為滁州錄事叅軍時周世宗盡取淮北  
州郡滁州危急團練使郭廷謂欲降命延鄒草降表  
延鄒責以忠義廷謂以兵臨之延鄒擲筆曰大丈夫

終不負國為叛臣作降表廷謂殺之唐主命其子以

官

人物志

周惟簡鄱陽人隱居明易後主聞其名起布衣為集賢殿侍講以虞部郎中致仕還山金陵被圍思得奇士可使兵間者起授給事中副徐鉉使宋太祖召見惟簡奏曰臣本野人未嘗與聞使指伏聞終南山多靈藥願得棲隱太祖許之金陵平命為國子博士久之

上表請解官遂初志

唐餘紀傳



宋

金君卿字正叔浮梁人慶曆進士歷官秘書丞知臨川  
權江西提刑入為度支郎中嘗著易說有文集十五

卷林志

馬遵字仲塗樂平人嘗以監察御史為江淮發運判官  
就遷殿中侍御史為副使以言事謫知宣州後復為  
右司諫以禮部員外兼侍御史知雜事改吏部直龍  
圖閣性樂易喜議論其言事不為激訐杜衍范中淹

皆稱道之

宋史

按馬遵事蹟宋史所載止於此人物志叙其彈宰相梁適及爭歐陽修賈黯等補外事不知何據今從史傳刪去林志云遵所著有直清集今不傳

跋

張日新安仁人皇祐間為廣西邕州都監儂智高陷邕

日新力戰不支被執不屈死

林志

熊本字伯通鄱陽人慶厯進士熙寧初瀘川羅晏夸叛

以本察訪梓夔兩路本曰彼能援邊者以十二村之  
衆乃誘其酋領誅之諸脅從風而靡願世為漢官  
奴神宗曰熊本不傷財不病民一旦去百年之患檄  
奏詳明可嘉也河湟初復以本為秦鳳路都轉  
運使奏省官百四十員減浮費數十萬渝州南川獠  
人木斗叛詔本安撫夔路木斗以溱州地歸得五百  
里為四砦九堡建南平軍元豐中知滁州廣州召拜  
工部侍郎會宜州蠻擾邊道除龍圖閣待制知桂州

至則溪洞酋長請選將練士兵以代戍守益市馬以足騎兵宜州遂無事召為吏部侍郎以疾乞補外除龍圖閣待制知洪州再知杭州未幾卒有文集奏議

共八十卷

東都事略

王仲舒字茂先浮梁人慶厯進士歷越州推官池州軍判攝彭縣移宿州推官攝符離縣處煩治劇有能名以包拯薦遷昭義節度推官再遷太子中允賜五品服以疾辭熙寧歲饑勸分給食累贈朝奉大夫著有

野人集

人物志

章穀字仲弓餘干人慶厯進士授興遠簿遷資州軍事判官著作郎賜緋衣銀魚通判秀州船寇千餘殺掠沿海州郡呈制置司得軍二千人又鄉兵二千人出隘口防禦寇至督戰瀕死又明日寇大至與戰大敗之生擒二百人斬首三百人民始寧未幾以疾卒

同上

程適字遵塗樂平人仁宗朝以恩調尉再調簿三調錄叅一朝棄官請老朝廷方崇激廉退擢適太子中舍

制詞褒美英宗登極進勲騎都尉賜緋魚

同上

湯夏字起翁安仁人天聖進士倅黃川築城禦侮智高

歷知泗泉宣三州有政聲仁宗手勅褒美

同上

程節字信叔浮梁人嘉祐進士熙寧間朝廷有事南方

單騎銜命撫諭諸蠻上語苗時中曰程節真奇才遷

廣西運使帥桂府甚得蠻情官至寶文閣待制著有

竹溪集子鄰字欽之亦負將才節卒諸蠻反側廷議

以隣代蠻帖服如初

林志

程筠字德林節弟嘉祐進士授縣令時新法方行筠條  
其不便調知陳留均田賦平徭役不避權勢戚里訴  
之太后曰筠廉吏吾可撓其政耶擢戶部郎中知真  
州蘇軾美之以詩有君為赤縣有古風政聲直入明  
光宮之句

同上

張綬字文結德興人嘉祐進士權將作監丞按實昭宣  
使宋用臣不法事神宗直之後除太府少卿蔡京議  
置大錢綬力諫不便曰慶厯已行矣自是忤權臣久

歷外任著有梅堂詩集

同上

彭汝礪字器資鄱陽人舉進士第一王安石得其所著詩義善之以為國子監直講推監察御史裏行汝礪首陳十事曰正本任人守令理財養民賑興事變苗役鹽事措撙利害多人所難言者王中正李憲臨邊汝礪曰漢唐以兵付中人多致敗事神宗折之汝礪拱立不動伺間復言神宗卒為改容罷為江西轉運判官久之代還為京西路提點刑獄元祐中拜中書



舍人吳處厚繳進蔡確詩諫官交章請治汝礪曰此  
羅織之漸也且上疏論列已而確有謫命汝礪遂罷  
知滁州召為兵部侍郎徙刑部會有巨獄汝礪以為  
不可殺與執政異徙禮部又徙吏部紹聖初進尚書  
言者謂汝礪附會劉摯罷為寶文閣直學士知成都  
府又降待制知江州卒年五十四汝礪居家孝友與  
人寡合然有志於善平時與蔡確異趣確被貶又為  
之力辨人以此賢之所著有易義詩義奏議詩文五

十卷 東都事略

周文敏安仁人篤學敦行不求聞達嘗與周濂溪講性理之學於廬山濂溪甚起敬曰周君自是一團和氣門人侍郎天臺劉洪誌其墓曰直氣摩虹古人之風萬卷蟠胸學者之宗

人物志

彭汝方字直老汝礪之弟以蔭補太廟齋郎後知衢州時方臘陷歙睦抗而衢介于三郡之間賊勢張甚兵力寡弱衆皆奔潰汝方與郡僚段處約守孤城城陷

罵賊而死年七十一贈龍圖閣直學士

東都事略

按宋史汝方諡忠毅事略失載

張吉鄱陽人母方娠其父全客遊西蜀不還吉為兒時  
與彭汝礪同學嘗有詩云應是子規啼不到至今我  
父未歸家及長入蜀尋父往返者三其父遂以熙寧  
十年歸自蜀彭汝礪贈以詩云河可以竭山可徙我  
翁不歸行不已三往三復翁歸止翁行方壯今老矣  
兒昔未生今壯齒

鄱陽集

按張吉林志失載白志采補

董鉞字毅夫德興人治平進士任夔州轉運使遇事剛果耿介不羣致仕歸過黃州蘇東坡和鉞歸去來詞有左手引妻子右手抱琴書之句鉞自奉清約家無擔石儲所積惟圖書滿篋而已

人物志

董又字彥臣德興人治平進士累官大理寺卿進樂書釋青囊經遷敷文閣待制封華亭縣開國男哲宗累賜劉問且題門牌云數封天子詔兩代帝王師

林志

文邈字守易浮梁人行端學博熙寧進士為司農主簿  
王安石薦其才神宗召對與語大悅之擢兵部郎中  
太平通判後以議新法不合退而授徒講學遠近翕  
然從之號曰江東夫子

人物志

洪彥昇字仲達樂平人元豐登第調常熟尉歷殿中侍  
御史孤立任言責論蔡京再居元宰假紹述之名敗  
壞先朝法度朋奸誤國公私困敝願蚤賜英斷遣之  
出京何執中緣潛邸之舊德薄位尊願解其機政以

全晚節遷給事中嘗謁告一日而張商英復官之音  
經門下言者以為顧避封駁出知滁州尋加右文殿  
修撰進徽猷閣待制知吉州久之知潭州未行卒

宋史

朱尹字湯輔浮梁人舉元豐神童科召入禁欽慈皇后  
置膝上而撫之賜金錢玉果歷潭州司戶叅軍零陵  
令辟勾當公事進比部郎中建炎間使江淮上曰卿  
文學政事有聞於時所以選委

人物志

程博文樂平人舉進士王安石當國問趙抃江南人物

抃以博文對自開封戶漕擢為條例司首上奏羊事  
歲減費十八萬緡出知南劍州州有灘甚險博文請  
以度牒募僧鑿治妖氛起龍門博文縱囚使擊賊自  
効賊平囚亦如期還積官至司農少卿湖南運判

志

都隨字與時餘干人元豐進士有節操嘗以太常少卿  
使遼宣上威德遼使至亟問隨起居稱曰長者官至

宗正少卿

同上

張根字知常德興人甫冠第進士調臨江司理叅軍遂  
昌令當改京秩以四親在堂冀以父母之恩封大父  
母而貤妻封及母遂致仕得通直郎如其志時年三  
十一鄉人賢之屏處十年曾布曾肇鄒浩及本道使  
者上其行義徽宗召詣闕上言請罷錢塘製造局未  
幾通判杭州提舉江西常平言本道去歲捐租四十  
萬而戶部責償如初祖宗立法運上供額而給本錢  
數百萬緡使廣糴以待用比希恩者乃獻為羨餘故



歲計不足至為無名之歛詔貸所蠲租而以糴本錢還之六路改淮南轉運使以水災多乞蠲租賦散常平青苗米賑貸流民後以朝散大夫終於家

宋史

張撲字見素根之弟以進士歷官太常少卿侍御史鄭居中去位撲言朋黨分攻非朝廷福又劾郎員庸繆者十六人斥諸外升祕書少監

林志

鍾傳字弱翁樂平人本書生用李憲薦為蘭州推官紹聖中入對命幹當熙河涇原秦鳳三略公事夏人陷

燕州王文郁進築西安城論功加祕閣校理章淦帥  
渭命傅所置將苗履統衆會涇原之靈平夏人悉力  
來拒傅步騎二萬出不意造河梁以濟師遂作金城  
闕又獻白草原捷連進集賢殿修撰知熙州傅自始  
仕至此僅再歲遂擢帥熙秦俄責監永州稅再貶連  
州宗寧中復起知河中府歷鄆瀛渭三州擢顯謨閣  
待制歷知杭州真定永興太原延安府以故職卒

宋史

按傳雖因李憲章惇之薦而得官然幹略西夏頗有功故應錄

都頴字光遠餘干人少貧苦學讀書過目輒成誦元祐中嘗作七談述番陽山川人物之盛三千餘言七日而成辭艷意遠自謂比太沖十稔平子十二而無歟官至奉朝請司農少卿

人物志

馬存字子才樂平人元祐省試論以揚雄劉向為題存論曰方王莽以險怪愚弄天下學士大夫高節尚潔

者非引去則繼以死龔勝以清死鮑宣以悍死其憤甚矣雄斯時方著劇秦美新論以發揚其盛讀之令人氣拂膺不懌者累日嗚乎雄乎寧死爾其忍為此文哉典舉蘇軾奇之置高等京師競傳因呼為拂膺公庭試策言臣之深思常略於東南而獨在北方詳定官蘇轍喜其遠慮欲以冠多士同列間之抑居第四授鎮南節度推官再調越州觀察推官紹聖三年卒存蚤游太學研經以考道觀史以究治亂之變搖

毫頃刻數千言文學鉤一時文集二十卷行世

同上

章公弼字右夫餘干人紹聖進士授建寧主簿聞朝廷廢劉摯范純仁托疾不起丁母憂廬墓三年以御史趙挺之薦累官禮部侍郎以疾歸有文集若干卷

林

志

金極字克中樂平人紹聖進士宰分宜上書乞斬蔡京以謝天下坐是廢錮久之方得解適意閒曠以市隱自號扁其廬曰醉鄉紹興初詔贈太常博士

同上

許中字與極樂平人元符進士與修會要六家諡法書  
成除校書郎歷兵部官出知虔桂二州進直寶文閣  
歷知鼎桂揚三州再知虔州在虔則繕治城隍在桂  
則撫綏嶠峒在鼎則截總餉以寬民力在揚則拓泮  
宮以淑青衿置義塚以收白骨敷歷中外多善蹟人

物志

程瑀字伯寓浮梁人其姑臧氏婦養瑀以為子姑沒始  
復本姓少有聲太學試為第一累官至校書郎為臧

氏父母服闋除兵部員外郎金人入侵求可使者  
瑀請往未行會欽宗即位議割三鎮命瑀往河東秦  
檜往河中瑀奏臣願奉使不願割地不報至中山諸  
將已得密諭城守不下瑀與金使王訥俱至燕山還  
除左正言金幹羅布與尼堪爭功故幹羅布欲和尼  
堪欲戰朝廷遣人齎蠟書約伊都皆為尼堪所得瑀  
因言金兵圍我重鎮數月不能解豈能出塞共謀人  
之國莫若遣使議和然後謹飭邊備徐觀其變帝嘉

納之高宗即位召為司封員外郎遷光祿少卿國子  
司業請祠主管亳州明道宮尋召赴行在條上十四  
事皆切時務以敷文閣待制知信州胡安國劉一止  
言瑀忠信可以備獻納正直可以司風憲不宜去遂  
復留未幾以徽猷閣待制知撫州提舉江州太平興  
國宮居父母喪服除知嚴州徙宣州復奉祠俄召赴  
行在除兵部侍郎兼侍讀晉兵部尚書檜既主和瑀  
議論不專以和為是檜忌之改龍圖閣學士知信州降



朝議大夫卒年六十六檜死瑀子孫乃免銅有奏議

六卷 宋史

程不器樂平人元符進士出守廣德時方臘兵熾廣德  
實兵衝增陴浚隍峙糧練士為守戰計臘知有備引  
去子移忠字孝嚴以父蔭入官歷建德尉池州戶曹  
戢奸束吏有能譽親嘗寢疾七年移忠夜不解帶視  
湯藥執喪癯瘠過制以孝名

人物志

張甲字大用德興人建中靖國時為邕州巡檢政和中

金兵入侵力戰死德祐元年詔贈忠利侯

林志

洪揖字元濟樂平人累官直祕閣充編修國史靖康後  
乞祠里居適趣林泉起知撫太平二州料州兵以平  
劇盜發義廩以活饑民恩威甚著性雅淡為政不務

赫赫聲

人物志

董濬字禹川德興人崇寧進士除太學錄徽宗賜對陳  
治道千餘言授祕書少監時有東宮官奏罷讀孟子  
濬力詆其非謂使東宮獨不得聞仁義之言堯舜之

道乞罷言者上善之出為江西提刑知興仁府召對  
言為治在於力行先自治以定大業數百言尋請老  
所著有五行新書周官辨疑大成書等集

林志

張擴字彥實德興人崇寧進士授國子監簿遷博士調  
處州司工曹事盜賊竊發守知其賢委以郡擴臨事  
精明威名大著名為祕書省校書郎尋充館職因議和固  
執以為不可遂求補外

人物志

方孟卿字正夫德興人崇寧進士擢直徽猷閣出為淮

南荆湖轉運使值金兵至淵聖密召諸路入援孟卿募兵赴難遷右司諫所著有奏議十卷

林志

余應球字國器德興人崇寧進士歷官監察御史奉旨言事三月間六十餘疏權奸忌之謫監達州茶稅召

為吏部員外郎遷朝議大夫封鄱陽縣開國男

同上

李轍字遵道浮梁人崇寧進士歷知巴陵俗薄惡至父子異居轍躬示孝弟俗遂變調繁昌時國步艱難民力凋瘵煦煦撫循惟恐不及歲嘗歎稱貸以給足每

郡調苛急多沮拾以身當之卒於官民悼而祀焉

同上

汪天任字莘老浮梁人大觀進士歷知汀州時方行王安石字說天任獨守六經不變所著有易說語孟新

意

同上

陶節夫字子禮鄱陽人晉大司馬侃之裔第進士起家為廣州錄事叅軍知新會縣廣守章濬重其材濬帥涇原辟入府崇寧初為講議司檢討官進虞部員外郎遷陝西轉運副使徙知延安府招降羌有功築石

堡等四城石堡以天淵為隍可趨惟一路夏人害粟其間以千數既為宋有其首驚曰漢家取我金窟塢亟發鐵騎來爭節夫分部將士遮禦之斬獲統軍以下數十百人擢顯謨閣待制龍圖閣直學士方議城銀州謀告夏人已東節夫料必西趨涇原遣裨將耿端彥疾驅至銀州五日成城夏人果從涇原至則城備已固遂遁去進樞密直學士尋領經制環慶涇原河東邊事言今既得石堡又城銀州西夏洪宥皆在

吾顧盼中橫山之地十有八九興州巢穴淺露直可以計取遂陳取興靈之策會朝廷罷經制司且棄所城地節夫乃求內郡徙洪州改江寧府歷青秦二州

知永興軍卒

宋史

李椿年字仲永浮梁人政和進士歷官度支郎中除顯謨閣兩浙運使檢括隱漏別為圖籍凡二十四條該盡田畝形勢閱七月告成升戶部侍郎權吏兵兩部封普寧郡開國侯所著有易說及文集

林志

程達字彥通浮梁人性好學老彌篤登第入官輒乞祠  
樂於教人多所成就所著有易解語孟直解五經解

題

同上

程汝能字公才德興人端蒙之祖天資純篤不由學問  
孝弟忠信自有以絕人母得未疾三年衣不解帶處  
家慈愛而能嚴子弟不敢為非理事沒三十年鄉人  
言之猶有出涕者父諱宏亦有鄉行

朱子集

蔡元裕字益之餘干人通五經尤長於易以窮理盡性



為本四方從學者衆湯漢饒魯李伯玉皆其門人所  
著春秋尚書論語解易繫中庸大學說宋名臣傳題  
所居齋曰強恕門人稱曰強恕先生

林志

汪藻字彥章德興人入太學中進士第調婺州觀察推  
官稍遷江西提舉學事司幹當公事尋除九域圖志  
所編修官再遷著作佐郎出通判宣州提點江州太  
平觀投閒凡八年高宗踐祚召試中書舍人時次揚  
州藻多論奏宰相黃潛善惡之遂假他事免為集英

殿修撰提舉太平觀明年復召為中書舍人兼直學士院擢給事中遷兵部侍郎無侍講拜翰林學士屬時多事詔令類出其手嘗論諸大將擁重兵寢成外重之勢且陳所以待將帥者三事後十年卒如其策紹興二年除龍圖閣直學士知湖州上言古者有國必有史故書榻前議論之辭則有時政記錄柱下見聞之實則有起居注類而次之謂之日歷修而成之謂之實錄今踰二十年無復日歷何以示來世乞即

臣所領州許臣訪尋故家文書纂集元符庚辰以來  
詔旨為日厯之備制可尋貶秩停官予祠六年修撰  
范沖言日厯國之大典比詔藻纂修事復中止恐遂  
散逸宜令就閒復卒前業詔賜史館修撰錢聽辟  
屬編類八年上所修書自元符庚辰至宣和乙巳詔  
旨凡六百六十五卷升顯謨閣學士遣使賜茶藥尋  
知徽州徙宣州言者論其嘗為蔡京王黼之客奪職  
居永州卒二十八年徽宗實錄成書右僕射湯思退

言藻嘗纂集詔旨比修實錄所取十盖八九深有力  
於斯文詔贈端明殿學士藻通顯三十年無屋廬以  
居博極羣書老不釋卷尤喜讀春秋左氏傳及西漢  
書工儷語多著述所為制詞人多傳誦

宋史

按汪藻所著有浮邱集

許尹字覺民樂平人政和進士歷知興化永處柳邛五  
州皆有善政高宗時攝蜀帥甚得人心進司農卿總  
川賦不忍重斂民力以便宜積財粟孝宗即位尹奏

乞延儒臣講求治道尋以敷文閣學士致仕有文集

數十卷

林志

鮑昱字季明浮梁人政和進士歷辰荆洪州教官祁門  
通判融州時帑庾匱竭昱攝州事戢奸貪謹出入用  
日以饒乃新學宮中教令上下翕然譽之移和州除  
江南東路安撫制置司叅議昱有定力不為浮議所  
惑故所至有聲子安行安國孫升之俱登進士第

同上

許元宗字幹譽樂平人登政和第初授揚子尉入為國

子博士同編修九域志轉太常博士遷司封員外郎  
金始與宋講交聘命元宗充賀生辰使夾攻之捷金  
歸我幽燕實謀深入使還及疆彼已轉糧發兵躡  
其後元宗入覲密以聞大臣方誇邊功不聽靖康初  
擢起居舍人尋請祠

人物志

李潤字仲行浮梁人政和進士歷官司封員外郎言選  
法朝廷是之權吏部侍郎以人才困於資格選法壞  
於因循延訪汲引剗弊殆盡嘗使金歸述山川關寨

以備異日屯守上慰勞之官終數文閣待制

林志

洪皓字光弼番陽人少有奇節政和進士建炎三年帝將如金陵皓上書言內患甫平外敵方熾若輕至建康恐金人乘虛侵軼宜先遣近臣往經營俟告辦回鑾未晚時朝議已定不從他日帝問宰輔近諫移蹕者為誰張浚以皓對時議遣使金國浚又薦皓擢徽猷閣待制假禮部尚書為大金通問使至太原留幾一年金遇使人禮日薄及至雲中尼堪迫二使仕劉

豫皓曰萬里銜命不得奉兩宮南歸恨力不能磔逆  
豫忍事之邪尼堪怒流遞冷山雲中至冷山行六十  
日距金主所都僅百里地苦寒四月草生八月已雪  
穴居百家陳王烏舍聚落也烏舍使皓教其八子或  
二年不給食盛夏衣麤布嘗大雪薪盡以馬矢然火  
煨麪食之金主以生子大赦許使人還鄉皓與張邵  
朱弁三人在遣中金人懼為患猶遣人追之及淮而  
皓已登舟十二年七月見於內殿力求郡養母皓自



建炎己酉出使留北中凡十五年同時使者十三人  
惟皓邵弁得生還而忠義之聲聞於天下者獨皓而  
已八月除徽猷閣直學士提舉萬壽觀兼權直學士  
院侍御史李文會劾皓不省母出知饒州尋居母喪  
言者猶謂皓睥睨鈞衡終喪除饒州通判李勤又附  
檮誣皓作欺世飛語責濠州團練副使安置英州徙  
袁州至南雄卒年六十八帝聞嗟惜之復敷文閣學  
士諡忠宣皓雖久在北廷不堪其苦然為金人所敬

所著詩文爭鈔誦求鋟梓既歸後使者至必問皓為  
何官居何地惟為檜所嫉不死於敵國乃死於讒慝  
皓博學強記有文集五十卷及帝王通要姓氏指南  
松漠紀聞金國文具錄等書子适遵邁

宋史

按林志以忠宣傳列于諸子之後又叙太略白志  
從宋史節存其槩

向伯奮字元伯樂平人以蔭補官攝開封脫死囚甚衆  
靖康國難伯奮監在京市易務時帑藏充羨金人求

索旨令押本務物輸之伯奮憤惋止用藥物雜品數輦隨以往詞直色厲金人信不疑尋聞偽詔棄官去高宗召知建州帥襄陽擒劇賊李彥猷王大漢甚著威聲當路薦其才召對陳四事上偉之孝宗嗣位擢戶部侍郎奏兵貴精不貴多黜老懦選精銳使人人可用則兵不冗財不匱尋得祠劉權王宣竊發廣右起知靜州伯奮威名素著至則約日出降後改知筠州復祕閣修撰

人物志

按伯奮所著有時論奏藁詩集

魏安行字彥成樂平人以進士授善化丞乞治劇自效  
得宰弋陽鑿渠洩水以灌民德之張浚薦知滁州滁  
當兵後景象荒耗安行至浸成樂土改京西漕言事  
忤時相謫官起知吉州治行為江右冠除戶部郎中  
進屯田十二策擢直敷文閣淮南運副提領營田事

尋請祠卒

林志

張燾字子公根之子宣和八年進士第三人靖康元年

李綱為親征行營使辟燾入幕建炎初通判湖州明受之變賊矯詔俾燾撫諭江浙燾不受上既復辟遷中書舍人以集英殿修撰提舉江州太平觀明年以兵部侍郎召金使張通古蕭哲至行在朝議欲上拜金詔燾曰陛下信王倫之虛詐發自聖斷不復謀議便欲行禮羣臣震懼罔措必已得梓宮已得母后已得宗族始可議通好經久之禮今彼特以通好為說意謂割地講和而已奈何遽欲屈而聽之一屈之後

不可復伸廷臣莫能正救曾魯仲連之不如豈不獲  
罪於天下萬世秦檜患之燾亦自知得罪託疾在告  
和議成范如圭請遣使朝八陵遂命判太宗正士裏  
與燾偕行九年五月至永安諸陵朝謁如禮自鄭州  
歷汴宋宿泗淮南以歸所言皆切中時病秦檜方主  
和惟恐少忤敵意悉置不問成都謀帥上曰張燾可  
第道遠恐其憚行檜以諭燾燾曰君命也焉敢辭十  
月以寶文閣學士知成都兼本路安撫使尋乞祠

以李璆代之璆自蜀歸卧家凡十有三年檜死舊人  
在者皆起璆除知建康府居二年進端明殿學士兼  
侍講以疾力辭不許除吏部尚書金使施宜生來璆  
奉詔館客宜生本閩人璆以首邱桑梓動之宜生於  
是漏敵情璆密奏早為備遷大中大夫復知建康府  
隆興元年遷叅知政事以老病不拜臺諫交章留之  
除資政殿大學士提舉萬壽觀及家固求致仕卒年  
七十五諡忠定

宋史

徐衡字季平樂平人以進士業遊太學遇朝建武學懔  
慨讀孫吳書試中武舉第一薦擢右職重和元年秋  
諸路大水時衡司江東西廩訪因命任兩路賑濟衡  
籍官民廩得粟五百萬斛錢十五萬緡又截留上供  
米隨所在貯之計口給貧多所存活又治舟楫以濟  
涉醫藥以療病瘞埋以卹死施舍以免責蠲賦緩刑  
皆且奏且行之詔下其法於諸路尋提典廣東刑獄  
廣有鉅盜劉隆者猖獗十年為一方患衡單車造壁



賊遂出降

人物志

張杞字南軒德興人宣和進士授登州牟平縣尉靖康之變從二帝北狩七年乃謀航海歷八月登錢塘岸調婺州司理叅軍有童子六七人以瓦石相擊誤殺一人首從不分將盡置法杞曰童子何知一日殺數人吾不忍卒從輕論改以薦擢監察御史歷吏部侍郎典詮無私縉紳歸重紹興己巳充金國信使勅賜笏帶名馬以寵其行還陞吏部尚書封永寧郡開國

男 同上

鮑琚字德彰浮梁人登進士攝安仁令召除軍器監使  
鈞考東南財賦琚收分閫兵入直宿衛遷右司員外

郎進直敷文閣知鎮江改廬州兼淮西安撫使

林志

程振字伯起樂平人少有俊才徽宗幸太學振以諸生  
高第得官提舉京東西路學事振奏立孟子祠以公  
孫丑萬章從祀入為監察御史兼太子舍人初見太  
子言古者大祭祀登餼受爵必以上嗣既禮經所載

元豐彝典具存昨上有事明堂而殿下不與非所以  
尊宗廟重社稷太子矍然曰初無人及此者由是驟  
加獎重欽宗受禪召拜吏部侍郎及聞金侵河北力  
請合諸路兵犄角擊之以牽其勢且曰彼猖獗如此  
陛下猶欲守和議而不使之少有所懲創乎欽宗是  
其言不能盡用也為刑部侍郎金邀天子幸其營求  
金不已振與梅執禮等四人同死之年五十七振天  
姿和厚有醞藉至論事則挺然不可回奪方徽宗崇

尚道家之說振至東宮從容及之曰周公作鷦鷯之  
詩孔子以為知道其言不過迨天之未陰雨綢繆牖  
戶而已他日太子為徽宗道之徽宗以為然及靖康  
中振尹京府言利者頗離間兩宮振善於調護由是  
無纖介之疑既死人皆出涕後贈端明殿學士同時  
死者陳知質安扶失其傳

東都事略

按林志振于端平中追諡剛愍東都事略宋史皆  
失載

石昉字德輝樂平人宣和進士授龍州司工曹事以靖  
康元年之官明年金兵入陝官吏失守惟隴守劉化  
源誓死不去檄昉權倖與昉畫地分守力不支金兵  
執之勒換授執不可盡室二十三人驅之北去拘置  
邠州洪皓留北與昉時相聞左右二帝於五國城與  
劉化源俱以不屈死

人物志

朱嗣孟字道鳴樂平人宣和進士為廣德司戶南渡初  
叛卒破鎮江遂犯廣德守倉皇遣使招安無敢當者

嗣孟雅自負不復遜直詣賊壘為陳逆順禍福使自擇所處賊以為忤殺之事聞官其子公慶終開化宰

同上

程克俊字元顓浮梁人宣和進士調湖州刑曹改太學錄召對論事訐直擢翰林學士時大將怙恩邀寵制書所及多裁抑之淮瓦梁堰淤廢被命往視盡得故址順昌之捷金使來和當直草誓約金主嘆服鄱陽學宮經兵火權貴請於朝以為墓旨已可其奏克俊

封還制書遷樞密院權參知政事以疾請祠卒諡章

靖著有易通解諸書

林志

程次山字際雲樂平人宣和入太學上書忤當軸安置  
光州靖康元年冬潰軍趙立陷光州次山與吳翊合  
謀復之是冬金人入汴次山隨河東經畧傅亮併力  
勤王至濟州奉迎高宗受冊移檄偽楚斥其僭義聲  
甚振車駕駐建康次山與魏祐上書忤宰相繫獄帝  
察其忠詔府尹湯東野出之

人物志

胡涓字霖卿鄱陽人靖康進士丞遂昌縣以生民利弊  
為念縣治距溪不數步而儒學切近其側每霖雨溪  
流漲溢則堤湍齧害涓因訪舊龍圖張根所築堤址  
而修甃之身自董役堤成百姓蒙其利

同上

按胡涓林志豫章書俱不載

汪澈字明遠自新安徙居饒州浮梁第進士教授衡沅  
用薦為祕書正字校書郎除監察御史進殿中侍御  
史時和戎歲久邊防浸弛澈陳養民養兵自治豫備



之說累數千言左相湯思退不協人望澈同陳俊卿  
劾罷又論鎮江大將劉寶十罪詔奪節子祠尋由御  
史中丞出為湖北京西宣諭使時唐鄧陳蔡汝穎相  
次歸職方未幾金主亮死澈乞出兵淮甸與荆襄軍  
夾擊其歸師未報而金新主罷兵請和召澈入為參  
知政事與宰相陳康伯同贊內禪孝宗即位銳意恢  
復首用張浚使江淮澈以參豫督軍荆襄將分道進  
討緒略就隆興元年入奏還武昌而張浚尅期大舉

詔澈出師應之澈以議不合乞令浚併領荆襄諫議大夫王大寶論澈無制勝策除資政殿學士提舉洞霄宮大寶疏再上落職仍祠祿明年知建康府尋除樞密使在位二年以觀文殿學士知鄂州兼安撫使孝宗訪邊事澈奏向者我有唐鄧為藩籬又皇甫侗控扼陳蔡敵不敢窺襄既失兩郡侗復內徙敵追新野相距百里爾臣令趙搏王宣築城儲糧分備要害有以待敵至於機會之來難以豫料孝宗善之時議

廢江州軍澈言不可知寧國府改福建安撫使復請  
祠致仕卒年六十三贈金紫光祿大夫諡莊敏有文  
集二十卷奏議十二卷

宋史

洪适字景伯皓長子也皓使朔方适年甫十三能任家  
事以皓出使恩補修職郎紹興十二年與弟遵同中  
博學宏詞科高宗曰父在遠方子能自立此忠義報  
也遂除勅令所刪定官後三年弟邁亦中是選由是  
三洪文名滿天下改祕書省正字甫數月皓歸忤秦

檜出知饒州适亦出為台州通判垂滿皓謫英州适  
後論罷往來嶺南省侍者九載檜死皓還道卒服闋  
起知荆門軍改知徽州尋提舉江東路常平茶鹽首  
言役法不均之弊升尚書戶部郎中總領淮東軍馬  
錢糧孝宗即位海州解圍符離用兵饋餉繁夥适究  
心調度供億無闕遷司農少卿隆興二年召貳太常  
兼權直學士院上欲除諸將環衛官詔討論其制适  
具唐及本朝沿革十一條上之除中書舍人時江淮

羽檄沓至書詔填委咨訪疇答率稱上旨自此有大  
用意金既尋盟首為賀生辰使得其要領以歸乾道  
元年五月遷翰林學士仍兼中書舍人秦頊久廢忽  
予祠适奏曰李林甫死後諸子皆流配嶺南秦檜稔  
惡自斃不肖之孫官職仍舊可謂幸矣宮觀雖小頊  
得之則人以為除用之漸恐檜黨牽連而進其命遂  
寢六月簽書樞密院事上諭參政錢端禮虞允文曰  
三省事與洪适商量東西府始同班奏事八月拜參

知政事十二月拜尚書右僕射同中書門下平章事

兼樞密使未幾乞歸卒諡文惠

同上

洪遵字景巖皓仲子以父蔭補承務郎與兄适同賜進士出身高宗以皓遠使擢為祕書省正字中興以來詞科中選即入館自遵始皓南還與朝論異出守遵遂乞外通判常婺越三州復入為正字八月兼權直學士院湯鵬舉副臺端密薦為御史方賜對而父訃聞免喪召對極陳父冤曰先臣與龔璿同出疆璿仕

於劉豫以妄殺兵官為豫所誅而秦檜贈以節旄擢  
用其子先臣拒金人之命留十五歲乃得歸顧南竄  
嶺外臣兄弟屏跡在外檜不分忠逆如此高宗悉為  
道謗語所起且曰卿再登三館嘗典書命今以修注  
處卿遂拜起居舍人奏乞以經筵官除罷及封章進  
對宴會錫予講讀問答等事萃為一書名之曰邇英  
記注其後乾道間又有祥曦殿記注實自遵始遷起  
居郎兼權樞密院都承旨舊制修注官經筵官許留

身奏事而近例無有遵奏請復舊制且言起居注未修者十五年請除見修月進外每月帶修皆從之二十九年拜中書舍人時勲臣子孫多躡居臺省遵極言侍從朝廷高選非如磨勘階官安有遷序之制望收還前詔又言瑞昌興國之間茶商失業聚為盜賊望揭榜開諭許其自新願充軍者填刺願為農者放還上皆可其奏尋試吏部侍郎遷翰林學士兼吏部尚書汪澈論湯思退罷相遵行制無貶詞澈以為言



遂丐去以徽猷閣直學士提舉太平興國宮三十一  
年完顏亮命蘇保衡由海道窺二浙朝廷以浙西副  
總管李寶禦之命遵知平江寶以舟師擣膠西凡資  
糧器械舟楫皆遵供億寶成功而歸遵之助為多先  
是朝廷慮商舶為賊得悉拘入官既而不返並海縣  
團萃巨艦及募水手民兵皆繫留未得去遵因對論  
之以船還商而聽水手自便吳人德之孝宗即位拜  
同知樞密院事連章乞免乾道六年起知信州徙知

建康提舉洞霄宮卒諡文安

同上

洪邁字景盧皓季子幼讀書日數千言一過目輒不忘從二兄試博學宏詞科邁獨被黜紹興十五年始中第授兩浙轉運司幹辦公事入為勅令所刪定官皓忤秦檜投閒檜憾未已遂出添差教授福州累遷吏部郎兼禮部除樞密檢詳文字建議令民入粟贖罪以紓國用又請嚴法駕出入之儀吳璘病篤朝論欲徙吳玠代之邁曰吳氏以功握蜀兵三十年毋使尾

大不掉知樞密院事葉義問出視師奏以邁叅議軍  
事至鎮江聞瓜州官軍與金人相持會建康走驛告  
急義問遽欲還邁力止之曰今退師無益京口勝敗  
之數而金陵開返旆人心搖動不可遷左司員外郎  
三十二年春金主褒遣左監軍高忠建來告登位且  
議和邁為館伴使時議遣使報聘邁慨然請行書用  
敵國禮至燕金閣門見國書呼曰不如式抑令改陪  
臣二字邁執不可多方困辱卒遣還乾道六年除知

贛州郡兵素驕小不如欲則跋扈郡歲遣千人戍九江是歲或休以至則留不復返衆遂反戈民訛言相驚百姓恟懼邁不為動但遣一校婉說之歸營徐詰什五長兩人械送潯陽斬於市尋知婺州奏金華田多沙勢不受水五日不雨則旱凡為公私塘堰及湖總八百三十七所婺軍素無律春給衣欲以緡易帛吏不可則羣呼嘯聚以計逮捕四十有八人置之理黨衆相嗾閔擁邁轎邁曰彼罪人也汝等何預衆遂

巡散去戮首惡二人梟之市餘黥撻有差莫敢譁者  
特遣敷文閣待制召對首論淮東邊備六要以提舉  
佑神觀兼侍講同修國史預修四朝帝紀進敷文閣  
直學士拜翰林學士上四朝史一祖八宗百七十八  
年為一書淳熙改元進煥章閣學士知紹興府明年  
再上章告老進龍圖閣學士尋以端明殿學士致仕  
是歲卒年八十贈光祿大夫諡文敏有容齋五筆居  
堅志行於世其他著述尤多

同上

按林志容齋所著尚有野處集孝宗為書序史傳  
失載

汪沆字濟遠浮梁人澈之兄也靖康間金兵入關結盟  
去沆時為太學生逆知敵必渝盟叩關上書極論求  
才練兵為守備計不報明年敵人再至沆以書抵粘  
罕陳內外大義用兵利害遂東歸遇李綱又投書有  
言不足慮實可慮者四綱避之竟以國耻未雪憤鬱

而卒

林志

戴松字桂之弟檉字寬甫父稠婺州人為饒州刺史因  
占籍鄱陽松中童子科進士官正字檉未仕稠病革  
謂松曰爾幸食祿王家念爾弟幼且貧所有田廬悉  
以畀之父歿松以田宅遜弟檉弗受彼此交讓各棲  
別館事聞命有司建禮遜坊以旌其義

安志

按前志載松寓賢今從安志改入入安志孝義傳  
尚有德興朱齡余按行樂平鄭時懋程愈浮梁甯  
從龍餘干張憲鄱陽葉耕附志姓名于此

江西通志卷八十七



欽定四庫全書

史部

江西通志卷八十八

詳校官監察御史臣范昶

檢討<sub>臣</sub>德生覆勘

總校官知縣<sub>臣</sub>楊懋珩

校對官編修<sub>臣</sub>沈清藻

謄錄監生<sub>臣</sub>戈廷模

欽定四庫全書

江西通志卷八十八

人物

饒州府

宋

程舟字濟川德興人紹興進士仕桂陽丞所著有雷溪

文集與兄偁皆以文學知名教授弟子

朱子全集

董琦字順之德興人年二十五始從韓溪程公受春秋

學義役法行首出田粟里人賴之為人精悍議論貴  
決白涉世不偶更折節為儒生自力於善老年漸屏  
家務即所居旁藝花果以自娛以子銖故授迪功郎  
同上

李儼甫鄱陽人母疾籲天刲股疾亟鑿肝以進母疾頓  
蘇異香滿室紹興間表之曰孝子李儼甫之門

林志

王剛中字時亨樂平人紹興十五年進士第二人任某  
州推官改左宣義郎故事當召試秦檜怒其不詣已

授洪州教授檜死召見擢祕書省校書郎遷著作佐郎中書舍人言今日禦敵先務敵強則犯邊弱則請盟今弗計敵人之強弱必先自治擇將帥蒐戰士實邊儲備器械國勢富強將良士勇請盟則為漢文帝犯邊則為唐太宗上韙其言會西蜀謀帥上曰無以逾王剛中矣以龍圖閣待制知成都府置制四川時吳璘累官至大帥其下姚仲王彥等亦建節雄一方惟剛中檢身以法示人以禮不立崖塹馭吏恩威並

行羽檄紛沓從容裁決皆中機會敵騎度大散關人情洶洶剛中跨一馬夜馳二百里起吳璘於帳中責之曰大將與國義關休戚臨敵安得高枕而卧璘大驚又以一蠟丸書抵張正彥西師大集金兵敗走方議奏捷剛中倍道馳還謂其屬李燾曰將帥之功吾何有焉燾嘆曰身督戰而功成不居過人遠矣已乃差擇將士衆所推者上之朝備統帥選孝宗受禪以宮僚進左朝奉大夫召赴闕以足疾請祠提舉太平

興國宮歸次番陽營圃植竹號竹塢金犯淮有旨趣  
剛中入見陳戰守之策除禮部尚書簽書樞密院進  
同知院事剛中曰戰守者實事和議者虛名不可恃  
虛名害實事又奏四事開屯田省浮費選將帥汰冗  
兵居政府屬疾卒年六十三贈光祿大夫謚恭簡繇  
布衣至公卿無他嗜好公退惟讀書著文為樂有易  
說春秋通議仙源聖紀經史辨漢唐史要覽天人修  
應錄東溪集應齋筆錄凡百餘卷

宋史

羅鞏字伯固樂平人與王剛中少以文相雄同登進士  
宰安福庭無淹訟強宗鉅室帖就繩墨用薦除宗正  
丞尋遷監察御史奏對剴切上謂左右曰朕得羅鞏  
居六察真御史也遷大理少卿明決果斷案下無冤  
民以疾畀祠

人物志

計衡字致平浮梁人紹興進士官徽州教授檢法監察  
御史轉朝奉大夫得祠衡博洽強毅遊太學時上書  
言天下大計者四留介使以款敵國之謀下詔書以

感河北之士先舉士以決進取之策用人望以激忠義之氣及入官每著善政死之日家無餘貲吳草廬

澄嘗稱為清白吏

林志

洪綸字德言樂平人擢第初尉咸寧尋令萬載察橫民為民害者雉獮之境内以肅乾道間歲大歉綸不復白長直發廩賑貸之部使者不以為罪更薦之朝命未下以憂去

人物志

夏穎達德興人甫冠舉於鄉補太學生靖康初金兵至



上命李綱與之決戰執政惑和議諷臺諫劾罷之穎  
達率同舍生陳東劉銓等六十餘人伏闕上書復用  
綱時張浚開閩江淮留幕下浚命其子拭受經術後  
奏補惠州文學遷鄂州蒲圻縣丞改知吉州龍泉縣  
歲大饑郡守希轉運使意不聽民訴災民遮穎達馬  
號泣以請詣府陳之不許因趨出悉取民所訴狀屬  
吏按行阡陌先蠲其租自詣轉運使得蠲恤屬邑效  
之移知清流縣數月以憂免

同上

趙善應字彥遠餘干人丞相汝愚之父官終修武郎江西兵馬都監性純孝嘗刺血和藥以進母畏雷每聞雷則披衣走其所母喪哭泣毀瘠終日俯首柩旁聞雷猶起側立垂涕父終肺疾每膳不忍以肺為羞母生歲值卯謂卯鬼神也終其身不食兔聞四方水旱輒憂形於色江淮警報至同僚會宴善應悵然曰此寧樂飲時耶衆為失色而罷夏不火草冬不破壤懼百蟲之遊蟄者失其所也晉陵尤袤稱之曰古君子

既卒丞相陳俊卿題其墓碣曰宋篤行君子趙公彥

遠之墓

朱子集墓志

程宏圖字士尚浮梁人工詞翰負氣節紹興講和以來  
金使道經凡官私門額悉覆之以楮隆興間金使往  
禾竺過太學門臨安尹命吏如例幕太學二字時宏  
圖直學欄幙立其下正色曰賢士之關國家儲才地  
何歉於遠人拒之不聽幕使白尹上聞孝宗在東宮  
嘉歎之後即位宏圖登第喜曰朕聞其名久矣他日

有用之佐也擢大理司直遷丞卒

人物志

余童字端蒙樂平人紹興進士為吉水令擢知信陽軍  
因圖信陽山川以獻且奏三關為荆楚之蔽信陽又  
三關之蔽失信陽則三關不足恃當使三關信陽相  
為犄角上覽圖甚善擢知蘄州行歉歲荒政等戶為  
三甚貧者與賑濟無蓋藏者與賑糶有田可服饑不  
能耕者與賑貸民不知為凶年除江西提舉卒平生  
嗜書乃擬立準虛為極書

同上

余時言字知默上饒人徙居浮梁紹興進士授安豐軍教授歷仕內外臺府有能聲贊上親征隆興初知漢州值蜀大歉所部獨登出粟活流民二十餘萬終數

文閣待制

林志

鍾炤之字彥昭樂平人紹興進士尉善化令宿松教宜陽士民愛敬仕潭日受教南軒張栻為書淇澳一章期以學問工到則人理明而本心立炤之服膺終身人物志

朱伯雄字少陽浮梁人紹興進士歷桂陽教授吉水知縣潛心六經集漢唐以下諸儒羽翼六經之說各以類從附以已見學者翕然宗之以董仲舒春秋繁露義有未當別著繁露十卷

同上

趙汝愚字子直漢王元佐七世孫居饒之餘干擢進士第一僉書寧國軍節度判官召試館職遷校書郎秘書少監兼權給事中言內侍陳元不宜使居總戎之任駁張說托言邊機不宜泄改密院文書經門下省

舊制以集英殿修撰帥福建進制置四川兼知成都府諸羌蠻相挺為邊患汝愚至悉以計分其勢孝宗謂其有文武威風紹興二年召為吏部尚書上常以五日一朝孝宗于重華宮至是往往以傳旨免汝愚往復規諫上意乃悟又屬嗣秀王伯圭調護于是兩宮之情始通除知樞密院事五年夏孝宗崩上日昃不出宰相率百官詣重華宮發喪留正汝愚議介少傅吳玠請憲聖太后垂簾暫主喪事憲聖不許汝愚

以國本係乎嘉王乃入奏云皇子嘉王仁孝夙成宜  
早正儲位以安人心不報越六日再請御批付丞相  
云歷事歲久念欲退閒留正見之懼因朝臨佯仆於  
庭密為去計汝愚自度不能辭其責與徐誼葉適謀  
可以白意于慈福宮者乃遣韓侂冑以內禪之意請  
於憲聖遇重華宮提舉關禮告之故因轉陳憲聖侂  
冑復命汝愚始以其事語陳睽余端翌日禪祭羣臣  
入憲聖垂簾汝愚率同列再拜奏皇帝疾未能執喪



臣等乞立皇子嘉王為太子以繫人心皇帝批出取  
太皇太后處分憲聖乃命皇子即位寧宗詣几筵殿  
哭盡哀衰服出就重華殿東廡素幄立內侍扶掖乃  
坐百官起居訖行禋祭汝愚特進右丞相力辭至再  
三不許而侂冑自以有定策功且依託肺腑出入宮  
掖居中用事朱熹進對以為言內批除熹宮觀吏部  
侍郎彭龜年力陳侂冑竊威福又奏近日逐朱熹太  
暴故欲陛下亦亟去此小人既而內批龜年與郡侂

胄勢益張日夜謀擯汝愚視正士如仇離正言李沐  
奏汝愚同姓將不利社稷乞罷其政遂罷相知福州  
國子祭酒李祥博士楊簡太府丞呂祖謙皆上書訴  
汝愚之忠太學生楊宏中等伏闕上疏悉得罪安置  
羈管去侂胄忌汝愚益深謂不重貶人言不已責寧  
遠軍節度副使永州安置為守臣錢鏊所窘暴薨天  
下聞而冤之侂胄誅盡復原官賜諡忠定所著詩文  
十五卷太祖實錄舉要宋朝諸臣奏議三百卷

宋史

姜夔字堯章德興人學詩於蕭千巖琢句精工有詩云  
夜暗歸雲繞柁牙江涵星影鴈團沙行人悵望蘇臺  
柳曾與吳王掃落花楊誠齋喜誦之謂其嗣伯子曰  
吾與汝弗如堯章也堯章號白石道人嘗請於朝欲  
正頌臺樂律以議不合而罷紹興間秦檜當國遂隱  
居箬坑之丁山叅政張燾累薦不起高宗賜宸翰建  
御書閣貯之以隱逸終

人物志

洪友成字士源樂平人宰興國邑早以蠲賦八分請守

拒不聽友成納印徑去守慙貽書勉留入為審計司  
遷大理寺丞因奏對援師說俾縣令與丞尉同訊獄  
梁成大詆為迂闊友成不為屈尋以親老丐郡得衡  
改瑞簡易為政州人便之

同上

馬元益字孝昭樂平人少負韜略紹興末柄臣諱言兵  
張浚言和不足恃竄永州元益方督造戎器上書乞  
乘敵未動先發制之大忤時相送桂陽編管已而敵  
謀果洩上追省前言大修戰備竟成辛巳之捷任至

閣門宣贊

同上

按以上二人林志不載

趙汝靚汝愚從弟餘干人潛心理學苦節不渝嘗作山

東書院留朱熹講學後人祀熹於書院靚亦從祀

同

上

趙宗憲字履常汝愚長子淳熙八年對策第一越三年復以進士擢甲科汝愚既貶死宗憲闔門自處居數年復汝愚故官職多勸以仕改奉議郎知南昌縣事

升籍田令崇憲拜命感泣陳疏力辭以為先臣之寬  
未悉昭白而其孤先被寵光非公朝所以勸忠孝厲  
廉恥之意俄改監行在都進奏院復引陳瓘論司馬  
光呂公著復官事申言之乞以所陳下三省集議使  
先臣之讒謫既辨忠節自明而憲聖慈烈皇后擁護  
之功德益顯然後申飭史官改正誣史又請正趙師  
召妄貢封章之罪究蔡璉與大臣為讎之姦燬龔頤  
正續稽古錄之妄詔兩省史官考訂以聞從之未幾

贈汝愚太師封沂國公擢崇憲軍器監丞改太府監丞遷祕書著作權考功郎請外知江州郡民歲苦和糴崇憲疏於朝求蠲之瑞昌民負茶引錢新舊累積困不能償死則以責其子孫猶弗貸會新券行視舊價幾倍徙崇憲亟請以新券一償舊券二受賜者千餘家遷轉運判官以兵部郎中召尋改司封皆固辭出知靜江府

宋史

按朱子集中答趙履常尺牘與論讀易之法其有

志于學可知蓋宗室中之賢者史傳特詳於家國之際意其必有著述惜無可考

許錫字晉之樂平人淳熙進士令建昌守興國用真德秀薦除夔路運判部內諸郡不產鐵而官責鼓鑄奪民鍤鋤以充錫奏罷之尤留意鹽筴一洗宿弊經用外所餘常例皆貯公帑視前頓倍分十萬為下戶輸賦而盡籍其數以聞久之除刑部郎中投劄廟堂以語取忤乞祠除知漳州不赴請老歸

人物志



董燭字季興德興人受學沙隨程氏紹熙進士知瑞安  
改辰溪值歲饑行救荒策民賴以蘇寧宗褒之召見  
進所謨救荒活民書敕曰爾忠為報國誠在愛民自

號南隱集

林志

柴中行字與之餘千人紹熙進士授撫州軍事推官韓  
侂胄禁道學校文轉運司移檄令自言非偽學中行  
奮筆曰自幼讀程頤書以收科第如以為偽不願考  
校調江州學教授母喪免廣西轉運司辟為幹官嘉

定初差主管尚書吏部架閣文字遷太學正升博士  
轉對首論主威奪而國勢輕次論士大夫寡廉隅乏  
骨鯁宜養天下剛毅果敢之氣末論權臣用事包苴  
成風今舊習猶在宜舉行先朝痛繩賊吏之法遷太  
常主簿出知光州嚴保伍精閱習增闢屯田城濠營  
砦器械糗糧治行為淮右最遷西京轉運使兼提點  
刑獄改知襄陽兼京西帥仍領漕事江陵戎司移屯  
襄州兵政久弛中行白於朝考覈軍實舊額二萬二

千人存者纔半亟招補虛籍自是朝廷以節制之權  
歸帥司由是入為吏部郎官擢宗正少卿進祕閣修  
撰知贑州治盜有方境內清肅白祠得請以言罷理  
宗即位以右文殿修撰主管南京鴻慶宮卒所著有  
易繫集傳書集傳詩講義論語童蒙說宋史  
按人物志中行謚獻肅史傳失載

程端蒙字正思德興人朱子門人自名其齋曰求放心  
朱子為之銘淳熙七年領鄉貢補太學生時禁洛學

持書上諫議大夫王自然責其疏斥正學及對蘇程  
王氏策問主司意在陰詆朱子正思奮筆曰王氏以  
佛老之學蠹壞人心蘇氏有立朝大節不以變故死  
生動心此其天資超卓有非常人所可及者恨其學  
術未醇未免有戰國策士餘習繼孔孟之傳排異端  
闢邪說道統所傳不歸之二程又其誰哉自知所對  
不合時好投筆徑去自是遂不復應舉所著有性理  
字訓毓蒙明訓學則等書既卒朱子為墓表又稱其

弟端臨端本子實之亦知為學云

人物志

按朱子程正思墓表以為鄱陽人與此異又按朱子程正思像贊云其容退然若不勝衣而自勝有以舉烏獲之任其言若不出諸口而衛道足以摧髡行之鋒稱許如此其學行可知矣

原跋

曹建字立之餘干人幼穎悟厲學一日得河南程氏書讀之慨然盡棄其所為者而覃思於諸經聞張敬夫講道湖湘欲見之不能至有告以沙隨程氏學古行

高者即往從之既又聞陸氏兄弟獨以心之所得者  
為學則又往受其學晚年登朱子之門論易之大畜  
何天之衢建曰何其天之通達也熹大器之故易傳  
本其義建家居事母孝待弟姪友愛死之日正冠危  
坐語其弟廷曰吾雖病甚而學益進此心瑩潔無復  
纖翳語訖而歿

同上

按朱子集中曹立之墓表稱其學博而不雜約而  
不陋斯道之傳其庶幾乎史傳中顧不在朱子門

人之列特表出之

原跋

劉泌字伯正餘干人嘉泰進士歷官郡縣臺省院部以母老乞養嘗為母祈壽甘露三降庭梅

林志

劉伯正字直卿餘干人開禧進士積官監察御史有事於明堂雷電忽至執事者鮮不離次伯正立殿下紳笏儼然帝遂以大任期之拜叅知政事卒贈少保時論謂其立朝以靜重鎮浮不求名譽云

同上

鄒孟卿字醇甫餘干人開禧進士知豐城會興元軍士

張福莫簡亂殺制置聶子述總領楊尤鼎陷閬州果  
州廷議孟卿有文武材授行軍叅議與賊戰敗之簡  
自殺福請降陞四川制置兼茶馬使敵不敢犯邊後  
被譖賜死事白詔復其官諡忠襄 同上

洪邦直字應賢樂平人登第授婺源縣尉秩滿陞知縣  
事時饑大舉荒政民賴以活當路交薦特旨賜對除  
御史在婺源嘗以猛得怨既入察舊隸有誣之朝者  
上雅知邦直流誣者嶺表邦直懷不自安因丐去上



察其廉貧進官兩秩賜白金縣令增秩贈金自邦直

始人物志

趙必愿字立夫崇憲子以大父汝愚蔭調常熟丞嘉定  
七年舉進士歷知處泉台婺四州遷太府寺丞度支  
郎中改宗正少卿進太府卿權吏部右侍郎時邊事  
亟必愿請勅彭大雅以復夔責歸峽二守以自効伐  
順流之謀折擣虛之鋒備江陵之境守沅江益陽江  
以防衝突盡收江上民船無資敵用區畫皆中事機

改戶部尚書因迂丞相史嵩之屢乞祠不許卒

同上

甯時鳳字祥夫浮梁人登第官蘄州嘉定辛巳金兵圍  
蘄守李誠之云誰能共守諸僚佐不應獨時鳳曰見  
危授命臣子大節臨難而免吾不忍為卒死之

林志

張文之字子經樂平人通判濠州金兵至守孔福謀夜  
逸文之曰果爾輕動奈一城何自提兵出登橫澗山  
與敵相持十餘日經二十餘戰無外援力不能支被  
執送燕山欲授以官義不屈囚之土窟曰吾世受宋

恩其忍負國金人重之後王抃來議和見文之苦狀  
為請於金帥得一家書附抃還奏

同上

金從龍字誠之浮梁人嘉定進士知涪州樂溫時金兵  
侵蜀潰將王全者擁兵入境從龍任供餉留戍守邑  
賴以全魏了翁西歸見樂溫歸然獨存大加稱賞改  
知瀘州納溪兼通判未幾寇大至力不能支竟死事  
聞賜贈蔭

同上

王赧字國瑞樂平人嘉定進士授光州固始簿有經略

善撫綏明年金人圍光州趙解之改固始令厲兵完  
城紹定四年金兵渡淮守令望風遁趙舉輕騎襲金  
營出其不意得輜重以還金怒奮兵圍固始城濠深  
浚敵不能入相守三月無援趙度勢不可支乃屬固  
始民曰我不忍若等流離顧事勢不可為遂懷印赴  
漆井死諡勇節

人物志

史寅仲餘干人嘉定間以詩經登第仕至朝散郎知化  
州洞蠻負固督軍出捕没于陣贈朝散大夫蔭其子

林志

鍾宏字子虛樂平人從邑宰楊簡游見器重嘉定進士  
主建德簿再任貴溪丞著惠政同門袁甫表諸朝稱  
其學有淵源實得故閣學楊簡之傳由兩浙漕屬入  
為太學錄供職甫一月謁告省親累擢皆不起人物志

按宏所著有論語說約了齋綴集

李遇龍字叔興浮梁人紹定進士歷官樞密都丞旨刑

部侍郎集英殿修撰謚忠定改忠靖遇龍重厚深沉  
恒以國事為憂立朝規箴言必剴切在外輕徭薄征  
以紓民力繕城謹燧以固邊防募民粟廣屯種以足  
軍餉興學校精簡拔以起士類且矢死報國克復全  
蜀捷上聞有一念精誠堅忠定力之褒

林志

彭大雅字子文鄱陽人進士官朝請郎出為四川制置  
副使甚有威名嘉熙四年使北淳祐三年守重慶時  
蜀地殘破大雅披荊棘冒矢石築重慶城以禦利閥

蔽夔峽為蜀根抵人德之為立廟卒諡忠烈孫克紹  
博學能詩有學餘藁

豫章書

按彭大雅集中有致仕得請七律二章非卒官重  
慶者又按大雅于嘉熙淳祐中已入官矣鄱陽縣  
志以為寶祐進士者訛

原跋

史本鄱陽人性至孝父沒廬墓悲號有芝草之瑞舉進  
士試易經寧宗閱卷以為江南真秀才歷任至奉直

大夫居官廉潔時稱孝廉

林志

李伯玉字純甫餘干人端平二年進士第二授觀察推官召試館職歷詆貴戚大臣直聲暴起改校書郎奏言臺評迎合上意論罷尤焞楊棟盧鉞三人忠衷不辨乞同罷帝不允差知南康軍遷著作佐郎兼考功右司員外郎引故事彈臺臣蕭泰來遷著作郎帝怒降兩官罷叙復知邵武軍改湖北提點刑獄移福建度宗即位兼侍講權禮部侍郎兼同修國史實錄院同修撰賈似道嘗集百官議事忽厲聲曰諸君非似



道拔擢安得至此衆默然莫敢應者伯玉答曰伯玉  
殿試第二名平章不拔擢伯玉地步亦可以至此似  
道雖改容而有怒色旣退即治歸以顯文閣待制知  
龍興府右正言萬石論罷召入覲擢權禮部尚書兼  
侍讀似道益專國柄帝以伯玉舊學進之卧内相對  
泣下欲用以叅大政似道益忌之尋病卒伯玉嘗請  
罷童子科以為非所以成人材厚風俗趙汝騰嘗薦  
八士各有品目於伯玉曰銅山鐵壁立朝風節大較

似之所著有斛峰集

宋史

馬廷鸞字翔仲樂平人淳祐進士調池州教授召試館  
職時外戚謝堂厲文翁內侍盧允升董宋臣用事廷  
鸞試策言彊君德重相權收直臣防近習大與時迂  
遷祕書省正字四年尤焞提舉史事辟為史館校勘  
遷校書郎兼權樞密院編修官時賈似道自江上還  
位望赫弈廷鸞未嘗親之遷樞密院編修官擢起居  
舍人進中書舍人遷禮部侍郎理宗遺詔度宗登極

詔皆廷鸞所草兼侍讀辭不許疏列孝宗之政以告  
升直學士院咸淳元年進端明殿學士簽書樞密院  
事兼權叅知政事同知樞密院事進右丞相及辭位  
帝惻怛久之曰丞相勉為朕留廷鸞言臣死亡無日  
恐不得再見君父然國事方殷疆圉孔棘天下安危  
人主不知國家利害羣臣不知軍前勝負列閭不知  
陛下與元老大臣惟懷永圖臣死且瞑目頓首涕泣  
而退自罷相歸又十七年而薨

同上

按豫章書載廷鸞所著有六經集傳語孟會編楚  
詞補記洙泗裔編讀莊筆記皇極觀物外篇諸書  
朱貌孫字興甫浮梁人淳祐進士丁大全在臺勢焰熏  
灼天久陰雨貌孫貽書政府言回積陰之道去姦邪  
罷手實蠲米稅姦邪指大全也丞相董槐得書嘉歎  
主管尚書工部架閣文字宦者董宋臣寵幸用事貌  
孫發策試胄子極論宦寺專權之患宋臣諷言者論  
之謁告歸省遷太學博士屬帝親擢監察御史兼宗

殿說書在講筵言及宋臣撓政事忤旨遷大理少卿  
又遷司農少卿兼太子右諭德詔許乘馬赴講貌孫  
諭導得體太子每為之改容兼國史院編修官實錄  
院檢討官兼權直舍人院時大禮成封命叢委吏持  
詞頭下每夕無慮數十貌孫運筆如飛夜未中已就  
皆溫潤典雅遷宗正少卿丁母憂服除授祕書監兼  
太子左諭德擢殿中侍御史所論皆當世急務宋臣  
覆出朝論紛然貌孫因對力斥其姦長星出東方貌

孫力議外戚內臣及進奉羨餘失人心者且曰回天  
心自回人心始辭旨懇切帝為之感動度宗即位擢  
右諫議大夫以疾乞辭言職遷吏部尚書不拜帝以  
舊學故雅欲留貌孫使者旁午於道而貌孫辭益力  
以華文閣學士知寧國府似道諷言者論罷久之提  
舉太平興國宮復華文閣學士知袁州移福建安撫  
使未行卒於袁之郡治有文集奏議行世

同上

董銖字叔仲德興人登進士授金華尉游朱子之門來

學者晦翁必命銖與辨難然後折衷所著有性理注  
解易註卒黃勉齋志其墓

林志

鍾季玉樂平人淳祐進士調為都大坑冶屬改知萬載  
縣淮東制置使李庭芝薦之遷審計院改宗正寺簿  
又遷樞密院編修出知建昌軍會有旨江西和糴季  
玉至郡才半年屬歲旱請於朝和糴得減三之一遷  
提舉常平未幾改江西轉運判官郡大胥以賄敗前  
使百計護之季玉卒窮治投嶺表俄以祕書丞召還

遭前使構讒而封駁之改都大提點坑冶北兵渡江

季玉徙寓建陽兵至不屈死之

宋史

陳學心安仁人淳祐進士官至高州知府謝枋得起兵

復安仁命學心守之元兵至戰死

人物志

朱宏字元禮浮梁人幼厭程式之習精研義理身體力

行朱熹嘗稱之曰高識篤行鮮與倫比為銘其堂曰

克已作回瀾集以斥佛氏述古冠婚喪祭之儀名曰

禮編

同上



金去偽字敬直浮梁人一舉於鄉即棄而從朱熹游潛  
心體驗學者稱曰草窓先生或勸之著書曰經經也  
史緯也諸儒之訓釋晦菴折衷之集其大成矣卒不  
著書授鍾離主簿不就

同上

董為良字景房德興人少學徐誠叟之門以文行聞於  
州再試禮部不第退而講學不復以榮達為事嘗作  
活國書一編識者韙之

朱子集

張顯字立道德興人與董盤澗程端蒙為友遡程朱之

學登進士授武義尉酒醋監理宗詔舉孝廉建康留  
守馬光祖以顯應持遷史館進三朝實錄穆陵玉牒  
經武要略等書

林志

按顯所著尚有雙澗文集

程珙字仲壁德興人師事晦翁親授玉山講義所著有  
易說及九疇策疏

人物志

按朱子集中有答程生珙尺牘

舒大邦字伯興德興人寶祐進士時賈似道專政凡除

授必以賂大邦恥之不願仕又禁於制不得歸後遇  
東宮赦始獲歸省遂集族黨子弟訓之館於鄭師樓  
適同年劉子秀過訪語以敵兵下諸郡邑江南危在  
旦夕大邦遂奮激舉義不逾月而遠近響應得數千  
人即部勒詣御前都統程大元部下期年滅南寇屢  
遷朝官光祿唱名賜宴上聞唱名舒大邦即召御座  
前謂曰朕萬幾賴卿等苟安大邦何以輸為即御筆  
於鴻臚劄上更名文英

同上

江介字邦直德興人少穎悟習制科業一日因讀程子書至水清性善之說恍若有悟乃喟然太息曰吾平生所學不過為利祿計耳是奚足為遂棄舊學走衢州謁徐誠叟講業其門居數年方歸登進士授興國司戶叅軍郡以廉吏薦調隆興府進賢令將行會天旱饑極陳救弊之策民賴全活旣而旁邑官吏多以救饑受賞或喻介盍自言介曰子饑而母乳之為賞乎會詔蠲民田租之半介白部使者自全戶三升以

下悉蠲之貧民被實惠又籍逃田收其租為繫囚飲  
食醫藥之費轉四川總領司主管時東川大饑介請  
得庫之羨錢往賑之民爭繪像立祠秩滿調恭州通  
判介自奉省約而周贍族姻甚厚文不務雕刻詞氣  
卓犖曲盡事理

朱子集

鄒近仁字季友樂平人為龍陽丞嘗叩道於楊簡一再  
語而頓覺性至孝或干以利介焉弗受人告之過歛  
衽以服所當為雖強禦不畏著有歸軒集

林志

鄒夢遇字元祥樂平人以詞賦薦於鄉為人孝弟喜愠  
不形處事一於義從邑宰楊簡遊簡謂自孔子沒學  
者陷溺於文辭議論喪本靈而事意見寥寥千載自  
知自信者少若夢遇者庶幾同邑有舒益字裕父洪  
簡字子裴以蔭補官知茶陵縣曹正字性之官永明  
尉學有自得寂靜弗忘酬應非擾方溥字成太誠確  
正直吳壩字仲和馬樸字季文以經學薦授廣昌主  
簿子燮字敬叔猶子應之字定翁王琦字表文以文

薦補學官余元發字永之以詞賦薦王晉老字子康  
以蔭入仕篤志於道皆簡門人

同上

洪芹僕射适之曾孫以大父澤入官甫更調登進士第  
為欽州教授部使者先後薦之入遷太學博士擢國  
博出通判南劍累遷將作少監權直祕書升直學士  
院中書舍人屬兵興帝悟柄任非人自貽國禍詔書  
所至聞者奮激蓋芹所草也丁大全罷相出典鄉郡  
芹繳奏大全鬼蜮之資穿窬之行乞從諫臣所請追

官遠竄以伸國法慷慨敢言天下義之帝方銳意向  
用而以論去退寓求嘉怡然自適卒有文集

宋史

李致遠字彥煥樂平人用薦補授瀏陽司征七更部授  
三典臬事推見情實吏不得欺時同邑有向友况宰  
歙邑邑有夜斃人於道而兇弗獲里胥懼失捕遽指  
某氏曰是嘗停死者顧置不問乎有司聽其言將以  
子證父定其罪友况喈曰父殺之子證之人情大不  
美且子方在幼安能勝簞楚哉歙守亦疑其枉委友



况覆出之踰年一惡少以敝攘敗及就鞫乃前日脫網之兇也一郡駭服

人物志

湯漢字伯紀安仁人真德秀在潭致漢為賓客江東提刑趙汝談薦漢於朝詔免解差充象山書院山長淳祐十二年充史館校書改國史寶錄院校勘會大水上封事曰君心敬肆之分實上天喜怒之由一念之敬上帝臨汝祥風慶雲所從出也一念之肆上帝震怒妖祲陰沴所從生也火災應詔復上封事言陛下

之所以未能任大守重而至於召怨宿禍者始於立  
心之未公成於持心之不敬私心為主而肆以行之  
此所以感動天地而水火之災捷出於數月之內也  
陛下得不亟為治亂持危之計而可復以常日玩易  
之心處之乎授太學博士召試館職遷祕書省校書  
郎升祕書郎提舉福建常平召為禮部郎官歷知隆  
興府入為玉牒所檢討官遷太府少卿改祕書少監  
度宗即位授太常少卿遷起居郎兼權中書舍人權

兵部侍郎久之以端明殿學士致仕卒年七十一特  
贈正奉大夫謚文清有文集六十卷 宋史

按湯漢所著名東澗集又有陶詩注若干卷

饒魯字伯輿餘干人從黃幹學幹問論語首篇時習是  
如何用功魯曰當兼二義繹之思慮熟之踐履幹大  
器之嘗以易赴棘試不過遂歸專意聖賢之學以致  
知力行為本中書舍人趙汝騰御史董槐左司諫湯  
中提刑蔡抗等皆相為引薦名不起時理學大明師

儒攸屬四方聘講無虛日作朋來館以居學者又作  
石洞書院前有兩峰因號雙峰門人私謚曰文元人

物志

齊興隆字昕翁德興人景定進士官蒲圻令值元兵下  
江南興隆義不食粟佩印綬以歸曰全吾印以還吾  
君全吾身以還吾親遂溺死

同上

胡允字玉叟樂平人景定五年鄉薦已而棄進士業專  
務義理之學所著有潛齋文集十卷

同上

詹載采字可厚樂平人咸淳進士授無為軍僉判北騎  
出沒蹂淮兵連禍結取需日酷民不聊生載采告守  
發義庾賑之尋命兼屯田司事役軍民疏湮壅塞築  
堤扞江疏斗門以走潦水又募民鑿陂塘以備旱淮  
人耕且安堵始教民士以學從令者免其賦役之半  
赴而復者賦役俱免政譽大著載采素友厚丞相葉  
夢鼎時與賈似道不合去國慮黨禍連及遂引年歸  
同上

陳牽字肇方安仁人父詩川以武功補沐陽令咸淳元年父子同舉進士調滁州司戶叅軍父喪免改荆閬糧料院又以母憂去調朐山主簿德祐元年繇海道歸杭授南安軍教授不就牽少與謝枋得遊會枋得起兵安仁首拔入幕執安仁令李景景牽里人也景請得以家貲二萬贖罪牽曰普天之下莫非王土家財獨非朝廷錢耶聲其罪斬之景子率鄉民五千報怨牽度勢不敵引兵趨信州就攝郡事益王即位牽

入覲遷宗正寺簿太府寺丞領江東安撫使出上饒  
接應郡縣所部才千餘人屯火燒山越數月戰潰被  
執至豫章元帥憐其才羈縻館留之遁去後三年復  
起兵尋敗入積煙山中自刎死所著有鶴心集弟年  
同時被執死焉

宋史

趙良淳字景程丞相汝愚曾孫累世以學行名號賢宗  
子良淳少學於其鄉先生饒魯知立身大節及仕所  
至以幹治稱而未嘗干人薦舉為冗官二十餘年考

舉及格改知分寧縣秩滿特差權江西安撫司機宜  
文字詔除諸司審計院督餉江西咸淳末廷臣議衆  
建宗室於內郡以為屏翰遂以良淳知安吉州尋以  
徐道隆為浙西提刑以輔良淳已而范文虎遣使持  
書招降良淳焚書斬其使元兵迫獨松關有旨趣道  
隆入衛道隆既去元兵至軍其東西門良淳率衆城  
守夜就芟舍陣上不歸先是朝廷遣將吳國定援宜  
興宜興已危不敢往乃如安吉見良淳良淳見國定



慷慨大言意其可用也請於朝留戍安吉已而國定  
開南門納外兵兵入城呼曰衆散元帥不殺汝於是  
衆號泣散去良淳歸府命家人出避乃閉閤自經有  
兵士解救之復蘇衆羅拜泣曰侍郎何自苦逃之猶  
可求生良淳叱曰我豈逃生者耶衆猶環守不去良  
淳大呼曰爾輩欲為亂耶衆涕泣出復投繯而死

上

周垕字良載鄱陽人咸淳進士署江東提刑幹辦時江

淮屢警廬繕城堡豐儲峙為捍禦計德祐乙亥元兵  
圍饒廬奉母入保郡城母卒既殯而城危丞相江萬  
里守臣唐震死之元將諭衆能以城降者除郡守衆  
推廬署降表廬泣辭夜遁南土平當路交薦起南劍  
治中同知廣州總管皆不拜結廬母墓下杜門隱居  
削迹城市後以孫伯琦貴累封番陽郡侯廬明經博  
學倜儻尚氣節世以魯仲連擬之稱曰梅山先生二

子應奎應極

豫章書

程時登字登庸樂平人自少慕義理之學聞董銖得朱  
子之傳而鄉鄰程古山學於盤澗者因往師之搜探  
幽微會博於約咸淳甲戌寇擾中原朝廷不廢科舉  
舊制合江東九路士試之時登裒然首舉明年登太  
學又明年而宋鼎移矣歸杜門謝游客四方請益之  
士嘗輻輳盈席一時名流多出其門元訪遺才每物  
色之輒謝去

人物志

吳中字中行樂平人早慕伊洛之學聞雙峰饒魯得考

亭朱子正緒從之遊體認精詳隱而不仕名籍籍當  
世部使者稅駕其門因質曰論語言心凡幾等中應  
聲曰簡在帝心天地之心也從心所欲不踰矩聖人  
之心也其心三月不違仁亞聖大賢之心也飽食終  
日無所用心衆人之心也使者愕然歎服

同上

余季芳字子初德興人少孤與兄木力學事母淳祐丁  
未及第言於銓曹曰受訓慈幃願明家學徵榮干祿  
實匪初心既竊收名志求歸養銓曹以聞敕報曰謝

名乞養臣子良心欲勵孝廉宜從所願特賜同進士

出身授九江府司法有桃谷書義桃谷詩稿

府志

余大昕字仲昭德興人性至孝以詩名程迥稱其恬淡古雅不下邵康節晚年以孝廉舉任潭州知錄著有

宜安集

林志

夏椅字景實德興人補太學生會朝廷起復史嵩之率同舍生上書爭之不報登進士授安慶教授遷知鉛山書視民如傷四字於座右歲饑救荒有奇政既解

去謝疊山作清廉引以紀其蹟遷安慶通判元兵至  
郡守范文虎降倚思勢不能支遂飲藥死

同上

章如旦字希周餘干人咸淳進士起家東陽主簿至撫  
州僉判元兵圍襄陽得江萬里書言呂文煥降泣不  
食三日與安仁陳陽見提刑謝枋得會枋得與張練  
帥議勤王帥大喜因與至弋陽入朱神廟卜如旦曰  
今國家大勢如此又何疑哉為臣子盡忠孝而已枋  
得顧陽曰壯哉章希周也德祐中元兵圍饒州枋得

集兵安仁如旦起兵迎之既而饒州降餘干亦降元兵攻安仁至團湖張孝忠戰死如旦敗走尋死之同

上

周樸字吉甫鄱陽人初從學於張采奇其才處之家塾樸以其知己事之不去時盜起江湖間州將以采知兵使督州兵討之盜有張家僮率衆掠邑里采將攻之而賊先發遂遇害樸走告州將誓欲為張復讎州將義之授以兵兵寡議者勸更募之樸曰我募而衆

彼亦衆矣不若出不意急擊之即擣賊所屯賊窮以  
金擲地兵爭取金賊脫去立斬數人以徇慷慨流涕  
誓不與賊俱生衆感動願効死力攻一寨破之餘寨  
皆走乘勝追擊斬首數千生擒僮斬之俎其心肺為  
文祭其師境內賊寨數十悉平之元兵至州將唐震  
死之衆勸吉甫降太守可得吉甫曰吾為師復讎而  
已他豈所望哉即日散遣所部隱居不復言功名

同

上



熊彥詩字叔雅安仁人潛心力學文鳴一時學者稱曲肱先生登進士累官至銀青光祿大夫後邑人翰林待制倪鏜奏立錦江書院以彥詩配享朱熹於東序

林志

高祥字夢麟餘干人讀書悉諸經籍義理制度多發先儒所未發登咸淳進士除忠定書院山長從遊者衆築齋舍上方坪所著詩文三十卷

人物志

呂雲伸原名天孫鄱陽人咸淳間入太學為文不逐時

好以行誼著聞後拜國子學諭嘗語人曰文由道而著如穀粟布帛人間不可無者又曰文要易而難不可難而易也識者稱之

同上

董鼎字季亨德興人受業於黃幹得其端緒著書傳纂疏同邑余芑舒亦潛心程朱之學著有書傳解

明一

統志

張宏字子廣鄱陽人性鯁直恬淡從柴益之學明經飭行及禁伊洛之學歎曰吾道窮矣乃歸隱少與柴與

之友與之以提刑出守訪宏拒其騶從不納與之退  
攜一童往謁淹住劇談君子謂宏之高古與之悔

過均足尚云

林志

元

祝泌字子涇德興人以進士授饒州路三司提幹傳邵  
氏皇極之學於廖應淮年老乞休御書觀物樓扁額  
賜之元世祖詔徵不赴著有觀物解六壬大占祝氏

秘鈐

縣志

趙介如字元道浮梁人從江萬里遊其學靜深有本登  
寶祐進士通判饒州元起為雙溪書院山長從者甚

衆人物志

馬端臨字貴與樂平人廷鸞子咸淳中漕試第一廷鸞  
與賈似道不合去國遂侍疾不與計偕入元父友留  
夢炎為吏部尚書欲引之以親疾力辭廷鸞薨起為  
柯山書院山長教授台州路學引年歸著有文獻通  
考大學集傳多識錄 同上

黃常字仲綱樂平人登進士歷官梧州通判假禮部侍郎使安南至承天門迎官請下馬常曰奉詔遠來當以禮進馳馬入承天門王長揖受詔常曰天朝以世子十年不入貢未欲加兵者以世子為禮義之國乃下此詔受詔不拜得無愧乎王亟拜稱謝使還遷江西行省叅知政事

同上

葉衡字仲興德興人任興化縣尹秩滿而去民立碑頌之有民苦賦斂侯為優助民苦盜賊侯為戢捕治其

吞併仁讓以興治其虛誕訟獄以清等語蓋非虛譽

云 同上

傅立字權甫德興人刻意學問有文名得里人祝泌皇極數學歷官奉政大夫致仕卒謚文懿立出入禁闥二十餘年眷遇加隆嘗建初菴書院以惠後學

林志

李思衍字克昌餘干人丞相巴延渡江遣武良弼下饒以思衍權樂平尋授袁州治中入為國子司業世祖以安南未附屢遣將攻之不克召拜禮部侍郎副叅

議圖嚕奉使招諭及至思衍曰大國之臣不拜小國之君禮也王笑曰敬其主以及其使亦禮也遂抗禮思衍宣諭威德辭語簡切王大敬之明日奉表款附贐使甚厚時圖嚕受思衍不受既還上勞慰問所贐怒圖嚕受思衍曰圖嚕受安小國之心臣不受全大國之體上賢之同上

按思衍所著有兩山詩集

徐明善鄱陽人至元間任江西儒學提舉嘗奉使安南

歷聘江浙湖廣三省考試拔黃縉卿於落卷中別號

方谷

人物志

周應極字南翁鄱陽人弱冠邃經史授婺源學正棄官  
歸養及喪免以姚穉王約劉敏中程鉅夫薦召見獻  
皇元頌擢翰林待制調集賢司直出同知池州事無  
留滯覈賦金之美者還民著為例英宗踐祚以舊臣  
召見勞問呼學士不名未幾卒兄應奎字明翁任饒  
州路治中饒穀宜私而輸以杭須轉糴他境應奎謂



任土作貢屢請於行省得以私輸民便之

林志

李楫字濟川鄱陽人大德間自袁州路經歷遷臨江新  
淦州判官時朝命使者巡行郡國至臨江官吏皆受  
譴責獨稱楫善遂遣楫往安福永新糾出吏贓萬計  
任淦六年長於聽斷每得隱情委謝鄰州縣款獄多  
所平反人稱明允終江西行省照磨

人物志

屈殷字子申鄱陽人以集賢待制李槃薦策試優等特  
除祕書丞乞便養改信州知事才明決信守王直號

良吏事每咨於殷御史薩里布哈張士弘考信羣吏

嘉殷清苦交薦其賢

同上

計初字遂初浮梁人授寧都州同知覈板冊以定賦出  
冤獄以正刑上下推服謁假歸省饑民起為亂當道  
檄初往諭盜遂息擒首惡三人抵以法州久無雪民  
苦瘡癘復任時大雪明年旱一禱輒雨民歌曰去年  
雪今年雨微計侯那得此

同上

朱公遷字克升樂平人至正初徵至京師授翰林直學

士院勸帝親賢遠佞修德卹民諸事當國者惡其切直章七上出為金華學正於經傳百家之書禮樂律歷制度文物之數無不通貫悉究用力於聖賢之道從學者常數百人學士黃潛一見特加敬愛稱其道德文章卓然名世所著見言行志大全性理諸書并著有詩經疏義

林志

韓光甫字炎鳳餘干人大德間薦為怯薛未幾授承務郎杭州路總管判官剖決疑獄築西湖堤以捍水田

遷汀州路同知循州知府

人物志

齊大同字周卿樂平人皇慶初議頒朔安南特遣往國  
王設宴明霞閣酒酣索詩授筆立成安南主臣敬嘆  
使還授龜盈州同知稱疾南還

同上

吳存字仲退鄱陽人自少力學有卓識部使者勸以仕  
不答延祐元年設科取士牒上無存名總管史烜曰  
不可無吳先生強起之果中選授本路學正任不及  
代歸調寧國路學教授未久引年去任七年聘主本

省鄉試至元五年卒於家所著有程朱易傳本義折

衷月灣詩集

林志

胡至仁餘干人延祐進士學有淵源與饒雙峰游博洽  
淹貫踐履純篤判樂平州致仕教授生徒臨川李實  
上饒王觀進賢胡棣皆其門人世稱為弋溪先生人

物志

李存字明遠安仁人延祐初一試不第遂杜門著書秘  
書李孝光舉以自代不果用葺書室曰俟齋人稱鄙

陽先生有修齋集三十卷危太樸為撰墓志

同上

按世所傳危太樸文集無李明遠墓志知非足本也

程淳字以正號竹洞德興人尊已先生實之之子與父同經互占魁亞登淳祐進士求近地以便養主徽州婺源簿去家纔三十里攝縣事廉勤和易仕終泉司檢察歸老於鄉所著有澹津記問龜峰稿竹洞稿府志

高驥字馴良餘干人天性敏異學問該博延祐西省堂試授瑞昌儒學教諭旣而以易舉進士不仕日與弟寄興詩酒有詩文若干卷臨川虞集金華黃縉為之

序

人物志

吳正道餘干人明六經許慎說文有不足者補之臨川吳澄嘗問曰楷模二字假借乎曰取義也淮南子草木譜云模木生周公塚其色正楷木生孔子塚其葉直若正與直可為法則況在聖人之塚乎澄大敬之

有六書原六書通正六書淵源圖澄為之序

同上

吳廷字仲迂浮梁人天資絕人力探理窟一舉於鄉不合不復屑意於詞章訓詁饒魯稱其立志堅確踐履篤實學者宗之號曰可堂先生後避兵隱橫塘山猶講道不廢使者表所居巷曰逸民所著有四書語錄五經發明先儒法言粹言重定綱目諸書

同上

湯自愿字伯恭餘干人至正間斬黃項普壽陷饒州所至殺掠慘酷自愿起兵未幾州陷挾諸弟姪走港西



習泰鄉率章黼黃士龍等結連臨川諸義士相為保陣其弟姪皆有膂力每戰必捷聲大振時號湯軍九月集兵復州治三日戰敗自願遭擒送饒州普壽欲其降不屈死

同上

李棠卿樂平人任無錫倉使張士誠入無錫棠卿遣人懷印間道納之行省尋被執棠卿顏色自若士誠曰殺之成其名乃囚繫倉所發憤卒

林志

朱公選字克用樂平人事元順帝累官憲副明兵至元

主集三宮議避兵北行趙巴延布哈慟哭諫曰天下者世祖之天下陛下當以死守奈何棄之不聽夜半

開門北奔公選亦以疏留弗獲遂自刃

人物志

汪伯正字以德樂平人少通春秋大義尚節氣至正戊子冬方谷珍聚衆海上伯正謁轅門備陳禦賊方略充叅謀軍事督攝海上左翼部伍與賊對壘大小七戰谷珍敗北錄功授婺源州判官壬辰徐壽輝遣偽將項普壽略陷饒信新安詔伯正拒之五月紅巾周

伯顏來陷饒徽伯正引兵自五嶺與平章薩木丹巴勒  
拿南兵勦之平南兵多北人不便險阻為紅巾所邀  
薩木丹巴勒僅以身免賊乘勝長驅入州伯正力戰死

同

上

李士會字有元樂平人少慧敏力學汎極古今子史百  
家而歸宿於六經文軌先秦兩漢以樂平起漢建安  
迄宋德祐上下千載無紀事者由是專意邑乘聞前  
輩有能道邑中前事不憚百里往咨之楊簡曹彥約

俱嘗尹是邑遺愛在民心則走江浙訪及子孫盡得其當時施設政教之實風鈔雪纂成樂平廣記三十卷邑人物始有據待制李粲稱其紀述備考覈精筆削嚴可方古史云

同上

劉明字衮明鄱陽人斬兵寇饒明糾集鄉民以義勇相保守官軍東來明為鄉導克復郡邑運糧開道遇賊力戰錄功授浮梁州判從征信陽病亟諭左右曰所恨者殘寇未滅不能盡忠於國耳言訖而逝

同上

夏璿字希政德興人至正間官湖廣行省都事兵至被擒不屈死之明興以孫原吉貴贈少師戶部尚書

林

志

倪鏜字仲瑤安仁人博學宏才應文學選任南康路教授遷翰林侍制再遷晉寧知州有惠政奏立錦江書

院以淑鄉之後學

同上

徐杰字杰之浮梁人幼以穎悟稱長益肆學問薦授象山書院山長學士盧摯稱之曰南州高士舉充江西

儒學提舉中書左丞善猷薦其才授詹事院賓客說

書

同上

徐嘉言字尚友德興人幼明敏嗜學尤長於春秋與兄芳谷齊名時稱二徐仕婺州學改饒州路教授未幾解冠去所著有春秋原旨三傳辨疑史隱集

人物志

程琰字伯圭德興人父龍斗宋咸淳進士官上饒主簿因先塋在邑之蛟塘自署曰蛟塘子讀書務臻實踐與胡雲峰鄒季友徐廷玉往還講習著有易經注義

書經注義

豫章書

屈任字濟民鄱陽人元末紅巾倡亂任與弟直中暨同里操宗義輩糾集鄉民保障寇至挺身抗鋒鏑力屈被擒賊帥迫之從任曰棄母之養從汝強賊天地神祇所不容賊帥曰義士也釋之

人物志

葉蘭字楚庭鄱陽人任太常寺禮儀院奉禮明太祖初立周伯琦應召以其名薦蘭曰吾世為元臣義不可仕弗就赴河石橋水以死

同上

胡振祖字振卿鄱陽人至正壬辰兵起倡義禦之迎平章薩木丹巴勒元帥韓彥邦軍為嚮導遂復饒以功轉倅本路踰年斬兵復至力戰被擒誘以降振祖曰吾為國以義保民身可死膝不可屈因紿寇置酒連酌至微酣奪戟刺殺數人而死

豫章書

邱省字公省餘干人至正間淮兵入境父被擒省以木椎追之擊死數人父得脫省死於賊

至正南昌死義

傳



許則祖字天則樂平人性剛居常習武事嘗歎曰大丈夫當死國難至正間兵起剽掠則祖倡義兵誓曰從令者賞犯令者誅克復德興踰年兵復來號數十萬則祖戰連捷乘勝追之馬陷潭泥中遂遇害事聞賜諡忠顯

同上

王銓字伯衡安仁人登進士歷官温州守時郡受兵銓被執不屈死其女聞之亦抱子赴水自溺

同上

黃復圭字均瑞安仁人博學以詩鳴至正兵起復圭陷

賊庭為詩罵之賊怒將剖其腹罵曰腹可剖赤心不

可剖遂死之

同上

吳氏三孝子文顯文昭文通德興人父逢濬隱居獨善  
寡與人合元季紅巾盜起逢濬避難為寇所掠三子  
冒矢石迎鋒鏑逢濬遇害三子皆死之後逢濬弟逢  
濟哀之闢地立廟祀焉

府志

周伯琦字伯溫饒州人父應極至大間為翰林侍制伯  
琦自幼從宦游京師入國學為上舍生積分及高等

去以蔭授將仕郎南海縣主簿三轉為翰林修撰改  
宣文閣授經郎教戚里大臣子弟每進講輒稱旨帝  
以伯琦工書法命篆宣文閣寶仍題扁宣文閣及摹  
王羲之所書蘭亭序智永所書千文刻石閣中嘗呼  
其字伯溫而不名會御史奏風憲宜用近臣特命僉  
廣東廉訪司事八年召入為翰林待制預修后妃功  
臣列傳累陞直學士除兵部侍郎與貢師泰同擢監  
察御史兩人皆南士之望一時榮之遷崇文太監兼

經筵官出為江東肅政廉訪使長槍鎖南班陷寧國  
伯琦與僚佐倉皇出走至杭州除兵部尚書改浙西  
肅政廉訪使丞相達實特穆爾承制假伯琦叅知政  
事招諭平江張士誠留平江者十餘年士誠既滅伯  
琦乃得歸鄱陽尋卒伯琦儀觀溫雅粹然如玉雖遭  
時多艱而善於自保博學工文章而尤以篆隸真草  
檀名當時嘗著六書正譌說文字原二書又有詩文  
藁若干卷

元史

按伯琦所著名近光扈從集

蔡深字淵仲樂平人以春秋中浙江鄉試授柯山書院  
山長轉徽州學教授值時多難歸不復起明初訪求  
宿學饒守陶安首薦詣公車以疾懇辭已酉江西設  
科舉藩省禮致司文衡得臨川吳伯宗發解廷對狀  
元及第人咸服其識鑑

人物志

徐素字淡如先籍餘干元末兵起挈家饒城遂為鄱人  
性穎博學邃於易禮楷書得歐陽率更顏魯公法郡

守陶安一見重之每公暇則延素咨諏民俗素傾心  
無隱為文善叙事著澹湖集十卷

同上

吳汝字國棟饒州人至正間戍邾城大水堤盡決悉力  
載石巨舫塞之徐壽輝倡亂破邾下武漢諸城汝起  
兵復武昌偽漢遁後飲黃鶴樓為漢兵襲破率其麾下  
渡江以圖興復不克死之部將黃榮劉戶沈權等  
統衆還饒州明太祖與陳友諒戰鄱陽黃榮以兵從  
榮稱戰時見汝白馬紅袍憑空助敵上勅封護國忠

臣顯靈王邾民立祠以祀之

湖廣通志

葉志道字士心德興人受學於劉靜修事母至孝母歿廬墓側有馴虎巢鳥之瑞事聞旌其門更徵之不起

歐陽元盧摯有詩美之

安志

按安志孝義傳尚有餘干艾易萬傳二人

吳樞鄱陽人有孝行嘗天旱井竭親思水莫能得樞對

井號泣須臾泉出清冽馨香人以為孝感

同上

江西通志卷八十八